


天津府志 第二函

教育部圖書室

22.62/0/2
1085.073
210

10



Inches
Centimetres

Kodak Color Control Patches

重修天津府志卷二十一

輿地三

隄閘 津梁

按近代治河專以隄防為主津屬五大河以至海河新舊隄閘不可勝數今一仿新通志以經河標名依次彙敘庶使脈絡分明其不屬經河諸隄仍各歸轄境分列以符全書通例


北運河諸隄

運河東岸隄自香河縣牛牧屯曲折入縣界至隄

頭村長一百八十一里西岸隄自廢灤縣碼頭至

蒲溝入縣界至桃花店長一百六十九里由桃花

店南至祇樹園以疊道代隄又由祇樹園至新莊



考十二

遙隄長四十五丈申新莊至三官廟月隄長七十丈

天津縣志

塌河淀隄在天津縣東北周約百里其西北有隄自何家莊樓接武清縣界起至孤雲寺北運河東隄止長十八里有奇其東北有隄自韓盛莊接武清縣界起至西隄頭止長二十里有奇乾隆五年修築

新通志

賈家沽口引河隄有道隄有引河隄俱長二十四里有奇乾隆五年築

陳家溝新引河隄自陳家溝至塌河淀邊兩岸長

三千七百餘丈又接塌河淀至薊運河西岸長一萬四千一百餘丈同治十三年築

俱同上

瞿黃口隄自河東關帝廟起至三取書院前止長二百四十餘丈康熙五十七年士民建書院於隄

口有碑記

天津縣志

筐兒港減河隄在武清縣東北運河東岸自閘口起至海廠止北隄長三十一里有奇又自閘口起至張五莊止南隄長三十一里有奇又自張五莊起至孤雲寺止長四十里康熙三十九年築天津縣主簿分管光緒七年重修

新通志

運河兩岸草壩西岸草壩一在下坡店武清縣主簿分管一在張家莊一在王家鋪皆王家務把總管一在火燒屯一在觀音堂皆武清縣北汛縣丞分管一在楊村一在馬家莊皆楊村南汛把總分管東岸草壩一在三里淺卽以三里淺把總分管一在東楊村武清縣楊村縣丞分管一在淖溝一在趙家莊一在孤雲寺皆淖溝千總分管同上永定河諸隄

鳳河隄埝雍正十一年始築鳳河東隄下段自天津縣韓家樹起至雙口村止長十二里以防渾水

東注乾隆五年接築中段自雙口起至武清縣龐家莊止長十四里十九年接韓家樹東隄尾起至桃花寺止築斜堰一道長七里三十六丈二十一年接築上段自武清縣陳辛莊起至龐各莊止長三十三里九分通長五十九里一百六十五丈三十七年建涵洞二處洩斜埝以北瀝水四十六年因斜堰逼近清河常被汕刷改由東隄四十八號起至天津桃花口北運河西岸止添築斜堰長七里三十丈其東隄四十九號以下及舊斜埝均廢原編六十號自是只管四十八號其一號至三十

七號一百七十七丈武清縣境以下天津縣境新志

韓家樹橫埵在天津縣西北十五里起自韓家樹北接鳳河東埵迄於桃花口之西沽又疊道長八里乾隆十年築

格淀隄一名隔淀大隄乾隆十年初建自大城縣莊兒頭起歷靜海縣抵天津縣西沽止長八十四里高九尺寬二尺至三十二年又自文安縣三灘里起至格淀隄莊兒頭止接築隄二千七百七十二丈及三十七年又將子牙河格淀改爲疊道增

設涵洞

廣福樓橫隄卽黑龍港下游也自大城縣小店村涵洞中界北起至廣福樓青縣界止長十里九分四釐乾隆五年築

張洪橋隄子牙新河隄也東岸自東隄頭接張洪橋隄北至靜海縣東灘子頭長十七里有奇西岸自廣福樓南起至靜海縣中灘子頭長十七里有奇

青縣古隄青縣護城隄舊志稱周城北西南三面今則惟西北兩面尙存遺址

滹沱別河隄青縣志稱爲滹沱故道隄東岸南接
交河縣入青縣界自劉家莊前起北至趙官營後
止長四十二里西岸自劉家莊前起北至流來堂
止長三十五里又接趙官營北至引河尾隄長四
十五里接流來堂北至金家營東支黑龍港口隄
長五十一里乾隆五年又於西岸修月縷各隄共
十八段南自後流來堂起北至戴家圈止長二千
二百六十丈乾隆十年又自第六鋪接大城境至
王家場交天津縣界止築隄三十六里

子牙河故道東隄南自引河尾起北至廣福樓前

道口止長三十六里五分乾隆六年築又自廣福
樓前起至大黃窪後靜海縣李家莊窠止長十二
里

子牙河東大隄青縣志自廣福樓村前起北至小
河店後接大城縣界止長十里三分又自大城縣
界起歷靜海縣界閻兒莊北至大瓦子頭盡處長
三十七里六分俱康熙二十九年築又自廣福樓
南至張洪橋止長二千五百十四丈乾隆六年築
子牙新河隄兩岸俱自青縣廣福樓北起入靜海
縣界東岸至李官屯止長十五里西岸至吳家莊

五
卷三十一
隄閘
五
窩止長十四里又接築東岸子牙分溜合黑龍港
入老君泊之隄其西自中灘子頭起北至賈口止
長三十九里有奇俱民修

賈口橫隄自東賈口起接子牙新河東隄頭至王
家營止長七里五分乾隆五年築以禦老君泊之
水

東支黑龍港隄南自金家營起至張洪橋止長四
千三百六丈四尺乾隆五年築民歲修青縣志乾
隆二十九年奏開引河導滹沱穿是隄北流東岸
隄工同時修築而張廣莊至金家營舊隄八里五

分遂爲緩工不加培補按黑龍港上游並中西兩
支皆係疏洩積水並無隄埝

格淀隄自當城以西爲子牙河通判管轄當城以
東天津同知管轄及三十七年尙書裘曰修總督
周元理以格淀隄衝坍奏請改爲疊道增建涵洞
並於坦坡灑種蕒稗以護隄根

獨流疊道係自津赴省大路舊有大橋一座涵洞
三座乾隆八年又添建七空橋一座因地勢窪下
連年子牙河汎水漲發直注獨流鎮疊道時被衝
刷故於二十五年又添五空橋一座於嘉慶十一

年又增修木橋四座

王二莊疊道在靜海縣西南自三禪坊起至子牙

鎮止長十二里有奇舊有疊道為子牙河溜衝決

乾隆十六年重修復被衝刷

大紅橋攔水壩在天津縣子牙河下口長十八丈

嘉慶十一年築又子牙岔支引河在紅橋東亦有

攔水壩長九丈同時築

廣福樓隄涵洞在子牙河大隄上乾隆二年建又

橫隄涵洞二座一屬大城一屬青縣俱乾隆五年

建以瀉交河等村瀝水

朱家窪滾水石壩石閘壩在靜海縣境貓兒莊子

牙河之東隄上乾隆十八年建閘在大城縣閻兒

莊亦屬東隄十九年總督方觀承請建

張洪橋涵洞一在東支黑龍港東隄一在金家營

一在李豹莊皆乾隆五年建以消十里窪中積水

俱同上

府境河道隄工分轄前志

天津靜海青縣三邑南運河隄工隸津軍同知管

轄

青縣靜海二邑東子牙河新河淀河隄工隸三角

淀通判管轄

滄州南皮縣南運河隄工隸天津府駐滄州糧捕通判管轄

按青縣靜海東子牙河新河淀河一帶隄工原隸河閒府河捕同知雍正十一年河院題准隸三角淀通判管轄又滄州運河減河工程原隸津軍同知南皮縣隄工原隸河閒府泊頭通判管轄乾隆三年題准改隸天津府駐滄州糧捕通判管轄南運河分汛

天津縣東西岸共長八十四里內分文武二汛額

設河兵四十一名

縣丞汛分管東岸北自渠黃口起南至碾坨嘴止計長四十二里分管河兵二十七名

把總汛分管西岸北自香林苑起南至碾坨嘴止計長四十二里分管河兵十四名

靜海縣東西兩岸共長二百零六里內分文武三汛額設河兵一百零三名

良王莊把總汛分管東岸北自碾坨嘴起南至田家隄止計長二十九里西岸北自碾坨嘴起南至喬家隄止計長二十九里分管河兵三十名

主簿汛分管東岸北自田家隄接界起南至陳官屯止計長四十一里西岸北自喬家隄接界起南至蘇家隄止計長四十一里分管河兵四十名
管河千總汛分管東岸北自陳官屯接界起南至馬廠止計長四十六里西岸北自蘇家隄接界起南至胡家新莊止計長二十里分管河兵三十名
青縣東西岸共長一百八十一里內分文武三汛額設河兵一百名
管河千總汛分管西岸北自趙家窪起南至佟家洞溜止計長二十八里分管河兵十名

主簿汛分管東岸北自馬廠起南至窩子口止計長四十一里西岸北自佟家洞溜起南至鮑家嘴止計長三十四里分管河兵四十五名
巡檢汛分管東岸北自窩子口接界起南至于官屯止計長二十二里西岸自鮑家嘴接界起南至河窪止計長五十六里分管河兵四十五名
滄州東西岸共長九十五里半內分文武二汛額設河兵一百九名

州判汛分管東岸北自安堵淺起南至佟家墳止計長二十九里西岸北自河窪起南至蓮花池止

計長十一里半分管河兵五十四名

把總汛分管東岸北自佟家墳接界起南至甌河

大寺前止計長二十八里西岸北自蓮花池接界

起南至好漢墳止計長二十七里分管河兵五十

五名俱同上

南皮縣

主簿汛分管西岸南自十二里隄接東光縣界起

北至大廟接新設把總汛界止計長五十九里額

設河兵三十一名

按以上皆分巡天津河道所轄合交河東光吳橋

景州故城清河六州縣共計十一州縣運河長一

千九十餘里現在官隄六百餘段歲修搶修工程

額領水利銀一萬五千兩向設淺夫八百九十八

名半康熙十五年裁汰四百四十名乾隆三年總

河劉於義題准淺夫改為河兵六百名分佈沿河

十一州縣防汛南河每名歲給銀十四兩四錢器

具銀八錢河兵例堆土牛北河無之經天津道張

坦熊額令十一州縣共堆土牛以防水泛又設河

兵堡房一百四十餘間以蔽風雨又令河兵冬春

之交各栽柳樹今十一州縣柳園三四或七八不

重修天津府志 卷二十一 隄閘
等又乾隆三年五月奉

旨將直隸河兵改爲戰一守九俾椿埽手得食戰糧欽遵
在案

子牙河大隄

青縣南自張宏橋起北至小河村靜海縣界止計
長二十四里主簿管轄

靜海縣南自小河村與青縣接界處起至北大瓦
子頭止計長三十二里主簿管轄

子牙河新河

青縣東岸南自廣福樓道口起北至李官屯與靜

海縣交界止計長十五里西岸南自廣福樓起北
至吳家莊窠與靜海縣交界止計長十四里主簿
管轄

靜海縣東岸南自張村與青縣交界起北至東賈
口止計長三十八里西岸自中灘子頭與青縣交
界起北至谷家莊止計長三十九里主簿管轄
附隄堰

興濟鎮村北減水河一道壩座金門五空長八丈
減河白壩口起至大波口止計長九十二里兩岸
築有土隄係雍正四年開建自壩口起至界濠止

係青縣管轄自界濠起至大波口止係滄州管轄
捷地村南減水河一道壩座金門五空長八丈減
河自壩口起至劉三家莊止計長一百一十里兩
岸築有土隄係雍正四年開建

蔡啟盛案以上隄壩至今歷變雖未能向道署查
案備載此已見前志者固應悉存故實因補錄之
此外上下
悉仍初稿

南運河諸隄聞

按南運河隄起交河縣日
字一號至三十七號止

日字三

十八號起至六十六號止長二十七里有奇分四
十一段有險工三第四段大李家縷隄迎溜頂沖
第十五段翦子屯月隄第三十五段白洋橋月隄

俱迎溜掃灣

新通志

東岸月字號南皮縣隄自洪字二十五號十二里
口北至大廟長四十六里分七十五段有險工六
第十四段蕭家圈官隄頂沖汕廠第十六段蕭家
圈民隄頂沖掃灣第十九段段家隄北第五十三
段殷家隄第三十六段劉家隄俱掃灣第四十四
段張家河月隄對溜頂沖

滄州隄又自大王廟前起入境至甄河寺南長二
十里有奇分三十九段有險工八第一段大廟隄
頂沖第四段西邢莊月隄第五段薛家窩隄第七

段東邢莊隄第十六段小無名月隄俱掃灣第二
十段娘娘廟前縷隄掃灣頂冲第三十二段無名
淺縷隄掃灣第三十七段三官廟西河岸頂冲掃
灣

東岸盈字號滄州隄自甄河大寺至佟家墳長二
十七里分三十二段有險工一第十九段回回灣
月隄掃灣又自佟家墳起至高官屯北交青縣興
濟汛長三十八里分六十五段有險工六第二十
七段堡子前河岸第四十一段大朱家墳月隄第
四十五段南橫隄老月隄第四十五段褚官屯南

老月隄俱掃灣第四十五段褚官屯月隄頂冲第
六十四段北安堵淺月隄掃灣

西岸昃字號滄州隄自日字六十六號南皮東北
界好漢墳北起至滄州蓮花池長二十九里分三
十段有險五第六段飲牛淺月隄第十二段蕭家
莊東月隄第十三段蕭家莊東北遙埝第十七段
流佛寺前縷隄第十九段流佛寺東月隄五處皆
掃灣又自蓮花池至河窪莊交興濟汛長十三里
分二十四段有險工五第一段蓮花池縷隄掃灣
第六段石塘淺月隄頂冲第十三段棗寺前月隄

第十段戴家圈遙隄第十九段楊家窪縷隄俱掃灣

東岸辰字號青縣隄自興濟汎南于官屯起至林官屯止長十八里有奇分二十五段有險工二第八段陡立曰興濟鎮渡口第二十段小張家淺北俱掃灣又自林官屯起至後馬廠交靜海縣界止長四十里分五十五段有險工八第七段譚缺屯西遙隄第八段譚缺屯北遙隄第十一段柳苗屯北遙隄第二十三段唐家窪遙隄第三十一段外八里唐月隄第四十六段界宿淺遙隄第四十八

段堡子前縷隄第五十二段後馬廠縷隄八處皆掃灣

西岸宿字號青縣隄自河窪北起至鮑家嘴止長二十六里分七十七段有險工八第四段鄧大圈縷隄第七段劉家院縷隄第十段花園後縷隄頂沖外坑第十八段邢家莊前土埝第二十八段姚家莊後遙隄第六十五段暨六十六段皆二道溝縷隄第七十五段劉家墳南隄俱掃灣又自鮑家嘴起至北蔡莊止長三十二里分二十七段有險工七第一段鮑家嘴縷隄第二段鮑家嘴

北遙隄第八段胡家莊月隄俱掃灣第十二段劉家墳月隄頂沖掃灣第二十段南蔡莊北遙隄頂沖第二十七段北蔡莊北遙隄掃灣又自北蔡莊至趙家窪止長三十二里有奇分五十三段有險工九第五段蕭家莊南老埝掃灣外窪第九段流河鎮河岸頂沖掃灣第十一段元帝廟前縷隄第十六段小屯西老埝第二十六段曲家莊縷隄俱頂沖掃灣第三十二段馬集縷埝迎溜第三十四段林家莊北縷埝頂沖掃灣第三十五段張家官屯遙隄頂沖第四十段佟家園縷隄迎溜頂沖

西岸列字號靜海縣隄自趙家窪起至曹家圪塔止長二十里分二十四段有險工二第二十段鈞臺北月隄第二十一段鄒家嘴河岸迎溜又自曹家圪塔起至大井止分七十四段有險工七第十一段程家縷隄第十五段蕭蘆縷隄俱頂沖掃灣第二十三段莫家縷隄掃灣第三十七段遂家院縷隄頂沖第五十二段大谷縷隄第六十七段小劉家縷隄第七十四段喬家縷隄俱頂沖掃灣又自大井起至碾坨嘴口止分工六十六段有險工五第十段大劉家縷隄第二十九段曹家縷隄俱頂

重刊天津府志 卷二十一 隄閘
沖掃灣第三十五段孫家縷隄迎溜頂沖第四十
三段臧家縷隄頂沖掃灣第五十八段桑園後縷
隄掃灣

南岸寒字號天津縣隄自碾坨嘴接良王莊汛東
至教場東頭止又東接海河南岸長四十二里有
奇分九十六段有險工二第十八段大蔣家莊後
縷隄第五十段小園南縷隄俱掃灣

北岸來字號天津縣隄自碾坨嘴接良王莊把總
汛東至獅子林以下不設隄埝俾運河之漲得分
洩於子牙入淀也亦長四十二里有奇又東則爲

海河疊道矣俱同上

海河疊道自城東南馬家口起歷靳家園梁家園
賀家口土城茶棚陳唐莊何家圈閘灰堆五里墩
雙港閘白塘口閘辛莊羊塢頭村鹹水沽茶棚葛
沽村楊惠莊舊水師營西門外橋止長一萬一千
五百二十丈爲海河西隄自東門外至鹹水沽舊
有疊道係官商捐修爲往來通衢乾隆四年因土
埝殘缺水由海道漫入經前天津道陳宏謀照遙
隄之議詳准棄岸培道以禦之二十七二十九三

十六等年俱加培縣志

西沽疊道在天津縣北自西沽北迤至桃花口界於運河西沽之間即天津縣驛路也共長二十五里自乾隆以來屢次修築新通志自北門外祇樹園起歷西沽踰淀河至丁字沽唐家灣王家莊劉家園汎茶棚王秦莊桃花口止長三千二百三十九丈五尺內四百四十一丈乾隆三年築外二千三百二丈五尺乾隆十年築嗣於十三十六二十五六七等年節經培修又接築五百五十餘丈縣志捷地減河隄壩自滄州捷地壩口起至劉三家莊止長一百五里雍正四年築又有遙隄一道在南

埵之外起自于家莊迄於小吳家莊長五十餘里其滾水壩於嘉慶十二年起高壩底龍骨二尺二寸壩口寬八丈新通志興濟減河隄壩自青縣興濟鎮壩口起至老隄頭止長八十三里雍正四年築其滾水壩於嘉慶十二年起高壩底龍骨二尺壩口寬留八丈靳官屯減河隄自靜海縣南靳官屯運河東岸起東至天津興農鎮接盛軍所開營田之河止長九十里此減河乃光緒六年新開者即以所出廢土培於兩岸築而成隄也

南減河涵洞一在滄州東北四十里子來屯南減
 河北岸一在子來屯東北二十里小吳家莊亦減
 河北岸一在小吳家莊東北十里閻家莊亦北岸
 由閻家莊東北又十里為呂家莊有兩涵洞一在
 南岸一在北岸按北減河無涵洞
 南運河諸口岸馮家口在南皮縣西北三十里與
 交河接界河東為南皮河西為交河 寨里口在
 靜海縣運河東岸 窩子口即靜海縣治 權家
 口在靜海縣北三里許運河東岸雍正五年議於
 此開引河後中止 獨流口在靜海西北十八里

其西岸外與淀泊地鄰 辛口在獨流北二十里
 運河東岸 柳口在辛口北十里天津縣西三十
 里今名楊柳青亦與淀近 稍直口在柳口北十
 里天津縣西二十里運河東南岸也 三岔口即
 三汊河在天津郡城東北里許下通海河 劈地
 口在天津縣東南一百餘里即海口俱同上
 天津縣諸隄

陸公隄舊志在西門外藏經閣前萬曆三十二年
 教場口岸衝決浸城甃二十四層河防同知陸敏
 捷請留兩營班軍修護城隄一道繞城西南二面

以絕水患至今名陸公隄前志考隄兩旁皆植柳故

又名柳林隄今西門外海會寺前所稱橫街者即

陸公隄頭南門外倪家臺東有小徑達閘口者即

陸公隄尾其中間一帶盡汗漫矣縣志

大閘在天津縣城東南隅引海河潮水入濠小閘

二在大閘西北南城根下一在東南面水洞一在

西南面水洞新通志城東南角石閘一座引海河潮

水週城四面由南城水門入城水門上有引汲受

福四字天津衛志順治十年大水閉塞閘口水涸濠平

內外渠溝皆不能通士民公呈請詳撫院照舊開

濬歲久傾圯雍正十三年紳士于并等呈請知府

李梅賓募修乾隆元年知府程鳳文重修縣志大閘

當是明永樂閒建天津衛城時舊制其水洞則康

熙十三年總兵趙良棟所設也新通志

馬家口新閘在城東南里許洩南淀之水係前明

所建見五聖廟崇禎年磬文歲久淤塞乾隆五十

六年天津道喬人傑詳請修閘二座一在舊口處

一在舊口池東壘道頭會於故地掘見古閘一座

即所淤塞者縣志

賀家口閘去大閘十里由賀家口又東南十里為

何家圈閘又東南十二里為雙港閘又東南二十里為白塘口閘四閘制同皆跨海河疊道上乾隆

二十八年修嘉慶十一年重修新通志

馮家口引河閘舊志載吳家嘴圍田引用海河潮

水雍正五年於馮家口建閘引水縣志

大沽引河閘在鹹水沽東五十里又梁家圍黃家

莊張滿莊邢家莊泥窩城上羊馮頭各有洩水溝

遇霖澇洩歸海同上

青縣諸隄

老鷓隄在青縣東南舊築隄於此防衛河泛溢以

形似名汴將葛從周敗劉仁恭處也前志引方輿紀要

神隄在青縣南衛河隄上有柳數百株永樂間知

縣王彬以河決盡沒民居痛不能救投水而死屍

漂入縣甬道官民憐之遂置祠隄上名曰神隄河間

府志案此見前志與縣志所引不符辨見宦績

古隄周迴城北西南三面縣志

東堂堰在青縣東北宋景德初知雄州何承矩請

令滄州乾甯軍視斗門引潮入御河東堂堰以益

唐水今皆湮廢前志引方輿紀要

滄州諸隄

永濟隄清池縣西北五十五里有永濟隄二永徽

二年築唐書地理志

永濟北隄在縣南三十里開元十六年築

明溝河隄清池縣西四十五里有明溝河隄二永

徽三年築

李彪淀東隄徒駭河西隄皆在清池縣西五十里

永徽三年築俱同上安瀾志以此為老黃河古隄新通志

志

衡漳隄清池縣西四十里有衡漳隄二顯慶元年

築西北六十里有衡漳東隄開元十年築唐書地理志

浮河隄清池縣南十五里開元十年築

楊通河隄清池縣南十五里開元十六年築俱同上

金隄即今衛河金人築元初復廣之州志

范家莊壩光緒十年疏濬東光滄南皮三州縣宣

惠河南北支流滄州官紳會商請於北岸范家莊

西建築計長百四十八丈下達蔡家窪匯石碑河

東流入海采訪冊

南皮縣諸隄

齊家堰在南皮縣西北二十里即衛河東岸河流

到此湍悍迅激勢剝東岸明萬曆四十一年雨水

泛漲隄勢單薄知縣徐殷督工修築自北下口至馬家口共計一千七百餘丈視舊隄加厚可憑永

久縣志按衛河即南運河今隄詳前此堰即在日字號中矣

古河岸岸高丈餘闊三里許境內同環約三十里

同上

卧龍岡行水金鑑甯津縣西三十里有古黃河自

吳橋入又北入南皮廣可二里兩岸廢隄隆然峭

立謂之卧龍岡又安瀾志慶雲縣亦有卧龍岡在

縣東南鬲津河中亦老黃河南岸隄也新通志

慶雲縣諸隄

長城嶺在慶雲南三十里沿馬頰河而東在馬頰

河南五里許安瀾志疑是馬頰古隄方輿紀要以

為齊之長城慶雲縣志或謂禹所築九河隄也新通志

徐家堰在陷河南汊河中前志云土人築之以障

水患縣志

杜家堰在陷河北杜家莊後

夾隄圈古隄西接樂陵分為二股中間地數里以

兩隄相夾故名

溝洫之可考者十一曰黑牛王溝曰海子王家莊

溝曰紀家鋪溝曰火燒鋪溝曰柳行張家莊溝曰
窪裏劉家莊溝曰馬家橋溝曰後馬家莊溝曰杜
樹劉家莊溝曰高墓臺溝曰竇家莊溝俱同上

津梁

天津縣

陰陽橋在郡城內縣志 襪子衚衕橋在東門外十

餘步 錦衣衛橋在小關東北明錦衣衛指揮地

乾隆十一年造 賈家橋邑人楊守魁於河東北

賈家口支河造大橋一座長三十餘丈寬二丈乾

隆三十六年王起鳳等重修 王孝子橋在河北

崇禎觀西北按橋畔有王孝子家故名 方家橋

在王孝子橋西 慈惠寺橋在西門外里許前有

橋今廢昔年引城西濠水 安西橋在衛安門外

明宏治八年造 鴻溝橋在城西北角明景泰三

年造 石橋一在東門內地西大街通東北水道

一在北門外河北距城二里順治十一年造因無

轍迹又名仙橋 金吾橋在香林院側柳陰數里

邑人爲遊憩之所相傳卽錦衣衛橋 鹹水沽橋

在縣鹹水沽海河上 西沽浮橋距城三里康熙

五十四年建俱同上 院署浮橋在三岔河西跨南

運河上本鹽院東渡後改浮橋同治中院署改爲
 總督兼北洋大臣行臺光緒中改建鐵橋泰西匠
 人承辦早晚放船往來以輪機引開紐合水陸均
 便采訪冊鈔關浮橋在北門外距城半里許本北
 馬頭渡康熙五十五年改爲浮橋鹽法道宋師曾
 設縣志鹽關浮橋在東門外半里許雍正八年建
 魚化橋在衛學櫺星門內明成化乙酉建今廢
 登瀛橋在衛學櫺星門外康熙十二年建帶
 河門橋 歸極門橋 鎮海門直橋 南斜街橋
 口口口橋 八里臺村前引河內橋 李七莊

前橋 張家道口橋 大寺村前橋 蘆北口村

後橋以上五橋皆乾隆三十六年重修板橋在北浮橋迤北大

石橋南 大石橋在天慶寺南今改天清觀 天

慶橋在大石橋北 惠利橋在天慶橋北俱同上

紅橋在惠利橋北百步跨子牙河水由橋下入白

河光緒 年改建鐵橋由泰西匠人承辦船往來

橋下無輪機開合與院署前異采訪冊鞏隄橋在

紅橋北百餘步係格淀隄頭橋縣志大紅橋在西

沽浮橋北南距鞏隄橋一里 直沽橋在丁字沽

南距大紅橋半里 汛安橋在直沽橋北五里唐

家灣西 玉橋在汎安橋北六里王家莊 福佑

橋在玉橋北五里桃花寺南 桃渡在福佑橋北

二里桃花口南 以上十三橋除板橋紅橋大紅橋三座外餘皆乾隆三十八年建

于家河橋在格淀隄上 王家河橋在格淀隄

上于家河橋西今廢 木橋在三隄頭新莊霍家

嘴南倉 以上三橋俱引河洩水乾隆三十年建 金鐘石橋甯河縣

志在天津東南西隄頭津甯交界處乾隆十一年

建橋下即塌河淀入七里海之水道 西平橋在

海光寺北距河半里寺四圍築隄東南通賀家口

西北通城濠津門十景中所謂平橋積雪即此今

廢 南平橋在海光寺南通百餘村鎮有閘以引

海河潮水折而流入東圈以灌斥鹵之田今廢

歡喜橋在海光寺西北角橋北草屋數椽下臨官

道橋南綠楊夾岸掩映紅蓮春夏遊人少長咸集

故名今廢 無礙橋在海光寺環渠上今廢 磨

菇橋在河東水關 西隄頭雙通盛橋在天津東

四十里接甯河縣界同治十年建有王鍾霖碑記

木橋在大畢莊迤西乾隆十年疏賈家沽道引

河宣洩塌河淀之水經此橋以達賈家沽道入於

河一在大直沽正東八里宣洩塌河淀之水由大

畢莊橋流經此橋以達賈家沽道今二橋俱毀

八里橋在大沽西八里 木橋在雙口淀河分流

處民建 閘橋七座城東南閘口閘馬家口閘賀

家口閘何家圈閘雙港閘白塘口閘各一以上閘橋七座

俱乾隆二十九年水利案內建三十二年加寬

三取書院渡即真武廟 獅子林渡 金家窩渡 東

窩義渡 西窩義渡東西二渡均楚雄府知府李錦設 隄頭渡

新莊渡 西沽火神廟渡 于王莊渡 席廠

渡 霍家背渡 柳臺渡 南倉渡 王家莊渡

魚化橋渡 北倉上下義渡此二渡均舉人曹步青設 桃

花寺渡 李家背渡 下蒲口渡 上蒲口渡

淖口渡以上均北運河渡 王白石門前渡 鹽院署東

渡改浮橋即今鐵橋 鹽院署西渡 大王廟渡 北馬

頭渡康熙中改浮橋 茶葉店義渡乾隆二十七年準提庵僧岫山募設

肉市口渡 趙家場渡 蓮提庵渡 梁家背渡

芥園渡 大園渡 福壽宮渡 大稍直口渡

梁家莊渡 楊柳青下渡 楊柳青上渡 碾

坨背渡以上南運河渡 西沽義渡康熙間改為浮橋 韓家樹

渡 三河頭渡以上淀河渡 新河渡 楊柳青後渡

地里阜渡以上子牙河渡 玉皇閣義渡王樞設 天后

宮義渡 楚雄府知府李錦設 鹽關渡 雍正間改為浮橋 龍王廟

義渡 查氏設 小聖廟渡 馬家口渡 火神廟渡

行宮渡 即寶船口渡 田家莊渡 即賀家口渡 土城渡

陳唐莊渡 何家圈渡 灰堆渡 馮家口義

渡 楚雄府知府李錦設 雙港渡 白塘口渡 後辛莊渡

郭家莊渡 南羊碼頭渡 于家莊渡 鹹水

沽渡 西泥沽渡 盤沽渡 葛沽渡 羊回莊

渡 蠻子營渡 鄧善沽渡 大沽渡 以上海河渡

晏公廟渡 在河 寇家口渡 在縣東南十里

案以上俱本縣志但志有舊有續兼錄不覈遂多重出知者已刪恐尚不盡且即同見續志亦恐不

實如院署西渡近接大王廟今此處只一渡俗呼刷紙廟斯類應不止一也

青縣

通濟橋在縣東衛河今廢 縣志 馬家橋在縣西十

里 馬有功橋即興濟閘橋 永安橋在城南門

外知縣劉瑛建今廢 登瀛橋在縣南七十里杜

林鎮臨滹沱河明天啟九年建 升仙橋在縣南

今廢 高家橋在縣西八里今廢 李三橋在縣

南八十里 木門橋在縣西南三十里 盤古橋

在縣西南三十五里康熙二十七年建乾隆八年

嘉慶四年俱重修 新集橋在新集鎮東咸豐元

年重修改名會瀛橋 太極橋上接半截河下通

清水溝道光二十五年重修 趙官營橋在趙官

營西 張宏橋在縣西十里王鎮店南跨子牙故

道 萬善橋在廣福樓前 吳召橋在西南三十

五里黑龍港 土橋在興濟鎮北二里跨減河上

為南北通行大路 打虎莊橋在打虎莊東南跨

減水河乾隆十七年修 小牛家莊橋在小牛家

莊 北街渡 舊在城隍廟後乾隆二十二年改至廟前 南街渡 中

街渡 以上三渡俱在縣城東 流河渡 興濟南渡 即古范橋渡

興濟北渡 窩子渡 在城南十五里光緒元年改設 南蔡莊

渡 在城外水次 屯渡 在城外水次 花園渡 俱同上

靜海縣

瓦子頭長橋縣西南二十五里跨子牙河上為靜

海大城分界乾隆二十九年建同治五年重修 縣志

于家莊 東西 石橋縣東八十里

在城渡 一在十字街一在真武廟西一在南閣北 碾坨背渡 與天津縣接界

雙塘渡 縣南十里 長屯渡 縣南二十五里 辛口渡 縣北

三十里 沙窩渡 縣北三十五里 岳家園渡 縣北二十五里 獨

流鎮渡 南北中三口 劉家營渡 縣北十里 河灘

渡 陳官屯渡 釣臺渡 縣南二十五里 高官屯渡 縣南

三里 新莊渡 以上俱南運河渡 趙家窪渡 北五里

莊渡 縣北五里 當城渡 縣北三里 水高莊渡 縣北二里

第六堡渡 縣北二里 唐官屯渡 縣南五里 宋家

馬道渡 縣西北二里 子牙河渡 縣西北四十里 楊柳青

渡 在縣北四十五里東去天津四十餘里地近丁字沽四面多植楊柳故名俱同上

滄州

流水板橋在州前徐家衚衕口凡城內大街之水

皆從橋下東流入坑今廢 州志 缸市街橋書鋪街

橋均在西關外道光十二年州人李輔同當商何

世慶等重修 東關大石橋在城東四十里 通

濟橋在南關河下 板橋在小南門外雞市街

普濟橋在南關外迤東乾隆六年州人崔世錫等

建 清真巷橋在清真巷 南關小石橋在城南

關外 南清真寺西橋 真武廟橋在城北真武

廟前今廢 馬家橋在西北小街子南 北月橋

在北門外光緒七年重修 碑記北月橋者前明隆慶年間所重建其初建

也不知始於何年亦不知幾經修造而傾圮敗壞每逢暑雨即斷行人嗚呼斯橋也宣洩瀝水之通

渠往來行人之要路豈可廢弛而不知修哉天德水局首事從九品陳峻山素行好義遇事敢為觀

斯橋圯缺即慨然思復光緒七年辛巳春商同會田鳳鳴董樹茂王化雯等倡捐布施併工營修整

牢固煥然一新斯役也於是年四月二十日興工六月二十日工竣橋比舊制高增五尺橋空闊增

五尺東西大道高增三尺闊增二丈橋外蓄水池
 徧栽蘆葦池畔栽柳以作歲修之資又恐其日久
 滋弊也乃復商同會友公請總鎮德公本州州主
 趙公出示立案並公擬章程數條以杜後患嗚呼
 倡斯舉者屢矣其思之深計之遠惟陳子峻山為
 最自今伊始出斯途者可以無憂窘步矣而說者
 謂北月橋為城北護煞有關於本城文風尤見
 斯橋宜與吾滄並垂不朽也夫是以為記 騎

鯨橋一名西市橋金大定中建以便東路戎馬之

往來元人復廣金隄水勢加峻遂致坍塌 觀燈

橋在城南古水月寺西每上元節州人於此觀燈

明宣德十年寺移城北此橋遺廢以上在城內外 捷地

橋一名觀音橋在城南十二里跨減水河崇禎九

年州人李嘉善等建今廢 張文炳觀音橋記節錄 僕滄以一郡界在津臨

之間其西則襟帶長河曉纜迷煙暮橈破月凡吳
 越諸蕃無不繇此以達神京每至春融冰泮挂帆
 而至者固不可以指數矣至與馬奔逐紛塵雜沓
 更為南北一大衝衢焉離城約十餘里有名為捷
 地者固津衛屯地也自河干接遠迤邐而東蒼茫
 雲樹映帶茅茨其間聚廬而處者不下數百家然
 而多隱君子將所謂鳴珂里不是過也南望人境
 之盡早壠平原悉皆康莊坦境但有沮洳一區來
 自河堰之旁橫截東注曩亦小構榷杓聊為利濟
 每值伐鼓舞羊之歲水激清浮輒為湍潦所漂溺
 因而歎病涉者實多人焉里中善士李君諱嘉善
 者獨有憂之爰就諸善士而謀之曰是必非一負
 薪捧土之所能為也更安所得東明弓以擊水乎
 固非移北山之石則不可於是聚眾鳩工洪維相
 度資費浩繁罔不贍給雖不必螭龍飛梁如張衡
 所賦而鑿銷建豎歷幾歲月而始告成橋成而後
 請記 謙廠店橋一名于家橋亦南北通津雍正
 於余 八年州人于士宏倡建嘉慶十九年州人劉清樑

重修並捐田為歲修費 茶棚橋在城南十五里

風化店橋在城東二十五里明宏治八年建

忠風化店新橋記節錄滄州南名絕隄舊有減水
河一道置閘以時啟閉棄北行可三百里而
絕海也由至風化店一舍凡山東諸路及長
蘆南十二場皆由此濟而為要津也徒行輿馬日
無慮千百水泛盜雖有舟楫每患漂溺水淺則苦
於襄涉也由是修善之人佈施勸募伐木石鳩工
匠謀作橋而利人也首築河底堅實樹以石柱凡
五空上密加之堅木以蘆葦厚覆之實以土此橋
之制也經始於宏治辛卯之十二月吉日至明年
壬子三月朔日成此作橋之 總其事者郭
普名徐普名而同心協助者則朱福名也橋梁本
有司事而三人者乃能効力 不煩有司
亦見其仁心之 而足嘉尚也使充是心而周
貧恤孤扶顛濟危又能裨益聖化之萬分一而進
為之善人也橋 成請予言鑿諸石

國朝道光二十六年知州李步瀛重修村中又有東

大橋西大橋南大橋 白兔莊橋跨減河在州東

南三十里道光六年本莊人楊允梧楊洵集捐

修光緒十年楊允正楊德魯重修

免莊自乾隆三十六年挑挖新河舊有橋梁行人
無阻滿之虞逆旅慶馳驅之便迄於今日久年深

風雨傾頽徒步人來不得臨流以渡乘車者至每
歎自滌而還有利濟之占因具重修之意闔莊人等隨

分捐資共為利濟之占因具重修之意闔莊人等隨
跋山數往來而不辭其苦督工匠者夙興夜寐冒

風雨而罔憚其勞其力既勤其功易舉於道光六
年四月上旬而此橋告竣焉 重修碑記蓋聞橋

梁所係為村莊往來要津自道光六年先世建議
公同鄉鄰協力勸修迄今六十餘年人免臨河之

歎車無濡軌之憂舟子之招可無煩絮詠焉不意

於光緒十年十月間忽被凌板撞塌竊慮工程浩大獨力難成又幸蒙莊鄰友愛共相捐資贊助是以庀材鳩工不逾月而全功告竣
李天木辛莊橋跨減河

在州東四十五里道光八年州人董靜亭倡修光緒十一年重修

小吳家莊橋跨南減河在州東北五十里

官莊橋跨南減河在州東北六十里

何家橋在城東北九十里 呂家橋在城東北

一百里以上跨南減河 楊家橋在城南三十五里光緒

十年重修 高家新莊橋在州東南十里光緒六

年重修 小王莊橋在州東南三十五里光緒十

三年重修 駕虹橋在舊城東關明萬歷中知州

盧廷選建

國朝康熙元年蕭家樓河決乾隆初重修嘉慶二年

知州周世榮重建二橋築疊道三百餘丈諸生龐

長年龐侃襄其事 舊州北關橋有疊道在新州

東南四十里久廢嘉慶三年知州周世榮重修築

疊道一百七十餘丈重修碑記節錄 滄之舊城

京東連青濟固畿南一要衝也第地勢卑下眾流

環繞有妨行旅故東北兩關舊有疊道以通往來

並建橋座以疏積水其有德於往來行人甚鉅自

乾隆十年來漸淪傾圮迄今五十餘載蕩然無存

每夏秋漲潦行者病涉是豈古道橋梁歲加葺治之意歟余承乏茲土過其地輒思振舉以復舊觀乃勸諭紳士商民續茲義舉且與寅好捐俸以倡於是樂輸者盈集又得諸生龐長年龐侃等不

憚勤勞分任厥事北關重建橋二座修築壘道三百餘丈東關修葺橋三座補築壘道一百七十餘丈經始於本年三月至五月而兩處鉅工告成夫事不期難期有益於治政不在大在有裨於民此舉雖微而農氓安於野行旅歡於塗彼董事捐貲諸人或盡其勞或助其費誠可嘉也故為文勒諸石并附各勤事姓名於後
 俾急公慕義者有所勸焉
 高堂橋在州東南

流口橋在駕虹橋東北州東南四十五里 道安

橋在城東六十里今廢以上跨石碑河 天潢橋在璋壁

莊後乾隆年建光緒十一年知州趙秉恆重修

普濟橋在劉家莊前光緒十二年建 半石橋在

北良莊後光緒十一年知州趙秉恆建一名通政

橋 新縣橋在新縣鎮光緒十一年知州趙秉恆

重修 羅疇橋在羅疇莊光緒十一年知州趙秉

恆重修 同文橋在城南東宋村莊以上跨宣惠河 良

口橋在州東北六十里 韓家橋在州東北六十

里 乾符橋在州東北八十里 同居鎮橋在興

濟東北鹽河今廢以上跨北減河 紀家橋在城南三十

里 趙家橋在城南三十五里 會通橋在舊城

西沈家鋪凡河決之水皆自此北流入海康熙元

年河決衝圯乾隆四年復修今廢 望海市橋在

城東四十里今廢 卜老橋在城東南七十里今

廢 小紅橋在州東北七十里今廢

蓮花渡

即南北渡南北通津道光八年州人宋廣泰捐修

菜市口渡

嘉慶

十六年州人

西關渡

嘉慶十四年十六年州人宋文成募修二十五年知

州寶景燕重修道光二十一年州人王晴圃等重修

插花廟渡

今廢

廟渡

城西

廠門口渡

今廢

火神廟渡

今廢

口渡

今廢

宗家口渡

今廢

戴家圈渡

城西北

小

聖廟渡

今廢

銀子窪渡

城西北

捷地渡

在州南

同上

南皮縣

登雲橋在學宮前邑令李正華建

縣志

興化橋在

興化寺前光緒十一年縣人張怡等重修

通濟

橋在東關

會川橋在南門西

門家橋在王莽

河 穆家橋在城北

張二橋

潞灌六橋在潞

灌莊

砥柱橋在縣東南十里

蕭家橋在縣東

南五十里枕高津河乾隆二十三年建

有碑

東

通濟橋在劉少煦莊枕宣惠河同治十二年重修

侯家橋在蘆莊

琵琶張橋均枕宣惠河 宣

惠橋在城東三十里枕宣惠河雍正年邑人張潘

修今廢

刁家橋

龍堂橋在龍堂村西北二里

枕宣惠河光緒年建東通滄州界

倪家橋在倪

家廟前

萬家橋在半壁店跨永濟河上

泊頭鎮義渡 在運河明邑令李正華設有碑記

續施義渡 明天啟元

年張氏設 薛家窩義渡 俱同上

鹽山縣

厚俗橋在南關厚俗門外為山東三省往來孔道

康熙十六年王璈建 縣志 敷德橋在西關敷德門

外亦東省往來孔道 阜物橋在東關阜物門外

韓家橋在縣南十里 劉家橋在縣西南十里

大王鋪橋在縣東南十里 黃家莊橋在縣東

三十里 高家灣橋在黃家莊東 以上俱跨普

惠橋在崔家口西距縣五十里康熙七年建跨老

黃河架木 邵汝德募修普惠橋記節錄崔家口鎮之迤北一里許有河相傳為黃河故道

所由東北入海者也自元人排河入淮河道南徙此流遂絕然至今猶稱河河當縣鎮往來之衝凡之縣若鎮咸取道於河不之河而之縣之鎮無繇也 通濟橋在程村東半

里許距縣四十里康熙七年建乾隆二十二年修

毛家橋在崔家口東五里乾隆二十三年修 以上

二橋跨馬頰河 邊家務橋在務南距縣十里 羊爾莊

三橋在鎮南一在關帝廟一在藥王廟一在土地

廟前 宣惠橋在高灣鎮南嘉慶十九年重修又

西橋亦嘉慶十九年重修 程村橋在縣東北跨

明白窪溝 協力橋在刁莊北嘉慶二十一年建

咸豐六年重修 惠成橋在清水溝北地為南北

通衢咸豐六年重修 無棣橋在路家莊南 新

店橋在村東為往來孔道道光七年重修 公義

橋在縣東南段家莊宣惠河上貢生李鈞建 海

溝橋在趙家鋪俱同上

慶雲縣

歲甘橋在東關南舊名東通濟橋乾隆二十一年

知縣甘怡重修總督方觀承改題今名有碑道光

二年陽信武生孫榑重修光緒十三年候補道金

福曾重修采訪冊

西通濟橋在西關邑人王豐純

王長清先後重修光緒十三年重修以上俱跨老黃河

馮家橋在縣東北十里光緒十三年重修 麻灣

橋在縣東北二十里光緒十三年重修以上四橋跨高津河

保安橋光緒十三年重修俱同上 棗園橋在縣

東南三十里長里許接海豐界乾隆閒邑人張連

城重修縣志按方輿紀要慶雲縣有棗園店橋長里

許跨故河上又有南家橋在東三十里亦跨故河

上今南家橋無可考故河即馬頰也 月陽橋在

縣東南二十二里明貢生宗汝甯建張拱齊希賢

各重修 任家橋在縣東南十五里一名三陽橋

胡悅然劉尙文重修 紀王橋在縣南三十里一

名吉坊橋明張允時建乾隆初重修有碑記嘉慶

十二年王永盛等重修 按光緒十七年重修 以上四橋皆跨馬頰河上 以

南臺橋在縣東北 中通濟橋在迎薰門外今

廢 映波橋在通濟橋西二里今廢 鎖瀾橋在

歲甘橋東今廢 迴瀾橋在縣東五里劉岳建今

廢 俱同上 蔣家橋在縣東四十里光緒二年重修

采訪 跨虹橋在撒家店北今廢 縣志 李用橋在

縣北二十里李扶重修今廢 黑牛王橋在縣西

北十餘里無棣溝上今廢 俱同上 卷二十一終

重修天津府志卷二十一

考十三

輿地四

古蹟 冢墓

天津縣

泉州故城在府西北漢置縣屬漁陽郡後魏省 舊通

志 水經注清河東北至泉州縣北入滹沱又沽河

東南逕泉州縣故城東王莽之泉調也 水經注 按通

志武清縣又有泉州城在縣東南四十里元順帝

常幸此記曰帝幸泉州是也又按武清縣志今縣

治為元時所遷漢縣故城在縣東南四十里天寶

初移雍奴縣治於武清今城東十里舊城在焉據此則有漢故城又有古武清城有元時所遷城有雍奴城及天津西北一城凡五城然據史魏併泉州入雍奴唐改雍奴為武清則雍奴即武清矣其所謂城東十里舊城者若以城為武清城城東十里舊城為雍奴城則雍奴武清本無二城若謂一為泉州城一為雍奴城則兩縣相去不應止於十里以諸志斷之武清只應有漢泉州一城雍奴一城即武清城元所遷一城凡三城據漢書沽水至泉州大海則泉州當在三岔河之北雍奴又當在泉州

之北通志武清縣之泉州則當是漢之雍奴府西北之泉州則漢泉州耳存以備考可也

前志

俞宗濂按今武清縣城為元時所遷其東十里之故城乃漢之雍奴而唐改名武清者也其東南四里之故城及漢之泉州武清縣志本不誤所誤者僅移雍奴縣治於武清一語然未嘗別言有雍奴故城也且縣志明言今城為元時所遷是元以前本無此城前志謂一為泉州一為雍奴兩縣相去不應止於十里此乃自生疑障非縣志之咎也前志謂武清縣之泉州是漢雍奴府西北之泉州乃漢泉州更屬臆斷若武清之泉州故城為漢雍奴則唐所改名武清者亦即此城而今武清縣城東十里之故城將何屬乎凡言古地理者必有遺址可據方能知其為古何地泉州遺址存否不可知而武清縣志則固尚里數安能決其在境內也西北既無遺址又無里數安能決其在境內也

角飛城在府東舊通志清河又東逕漂榆邑故城南

俗謂之角飛城趙記石勒使王述煮鹽於角飛即

城異名矣水經注按角飛城即漂榆故城方輿紀要

漂榆津在鹽山縣東北百里其說與通志不同水

經清河東北過漂榆邑酈道元曰漂榆故城趙記

石勒使王述煮鹽於角飛是矣魏氏土地記高城

東北一百里北盡漂榆東臨巨海民煮海水藉鹽

為業即此城也據史隋改漢高城為鹽山據水經

注清河由東光縣西又東北過南皮縣西又東北

逕浮陽縣西歷濊邑北鄉邑窮河邑南又東北至

泉州縣過漂榆邑入於海又據史浮陽城即清池

故城今舊滄州故城也畿輔通志舊滄州城在今

滄州城東南四十里鹽山縣在今滄州東南九十

里則在舊城東南五十里水經注濊邑在章武城

即乾符城也方輿紀要在今滄州西北八十里由

此而下又歷鄉邑窮河乃至漂榆則漂榆去鹽山

不止百里矣且水經注所謂泉州縣即漢書沽水

至泉州入海之泉州也所謂過濊邑北即潭水篇

所謂章武縣西故濊邑也今直沽為泉州沽水章

武沽水及衛河入海之地則漂榆津當在天津故

禹貢錐指亦謂漂榆故城在靜海縣畿輔通志天

津府東之說是也方輿紀要屬之鹽山悞前志

軍糧城元海運時屯糧之所舊通志按城在縣東南

七十里通志載寶坻縣東南二百里有軍糧城五

代時劉仁恭所作亦曰軍糧城蓋卽此軍糧城也

今入天津界前志

黑堡城在府西二十里地名稍直口舊通志

海津鎮今縣治本名直沽元延祐三年改爲海津

鎮至正九年立鎮撫司明永樂初由此南下滄州

二年築城置戍三年調天津衛及天津左衛來治

四年又調天津右衛治此設兵備道轄之舊志本

邊口關名在良鄉縣北百餘里自永樂改置三衛

天津之名遂移直沽矣大清一統志

乾符砦巷姑砦三女砦泥姑砦小南河砦宋志作河今訛

曰滄州清池縣有乾符巷姑三女泥姑小南河五

砦政和二年改巷姑曰海清三女曰三河泥姑曰

河平宋史地理志石晉以瀛莫歸契丹滄州之患益急

周世宗復關南列營戍守宋承其轍有滄州八砦

今見於志者此五砦方輿紀要按宋史河渠志王亞以

海口三女砦天所以限契丹則三女砦在今直沽

海口泥姑砦則方輿紀要謂卽今之小直沽小南

河砦在小直沽南十里海清砦在興濟縣東北前志
陸公隄在府城西門外

三义沽鹽場元學士王鶚碑云燕京寶坻蘆臺越
支昔日之鹽場也三义沽無鹽一日鹽滷湧出或
經日自生時以為瑞遂建場俱同上

浣俗亭在戶部分司署內明正德閒戶部郎中汪
必東建今廢前志

問津園在城東北錦衣衛橋魯菴張氏別業樹石
蔥蒨亭樹疎曠海內名流過津者無不假館稱為

小玉山云同上

一畝園在城外東北隅亦張氏別業中有垂虹榭

綠宜亭紅墜樓遂間堂諸勝今與問津園俱廢縣志

中隱園在鹽分司東偏新通志按園址今歸海關道署

沽水草堂在城東南六里安氏別業中饒水竹臺
榭之勝復構邃宇數楹藏弄金石書畫甚富時人
擬之清閼閣差不愧云今廢縣志

水西莊在城西三里芥園查氏別墅地周百畝水
木清華為津門園亭之冠中有攬翠軒枕谿廊數
帆臺藕香榭花影菴碧海浮螺亭泊月舫繡野篠
一犁春雨諸勝

陳元龍水西莊記直沽在京師東南三百里而近
滙衛白兩河及丁字沽合流入海凡畿內千里之
水皆趨赴焉汪洋瀾漫襟帶
輦轂志謂即古者九河入海之處近且設立府治列

於三輔拱衛
神京譬析木之津號為天漢泱泱乎稱天下之巨浸
矣又其地為漕運孔道冠蓋之所往來商賈之所

輻輳舟車絡繹百貨駢填鼓角管絃之聲不絕於
耳遠望滄溟蓬萊臺閣時隱現於波濤杳靄閒

若可攬而有也而自元置鎮以來獨未有為園以
收其勝者天行查君夙負異才抱遠識少遊京都

樂津門之雄且沃遂卜居者有年暇日留連水次
有會於心乃選材伐石闢地而構園焉既成亭臺

映發池沼灑抱竹木蔭庇於檐阿花卉續紛於階
砌其高可以眺其卑可以憩也津門之勝於是乎

得攬於几席矣遂名其園曰水西屬余記之查氏
之族最大遠近分居其居吾邑者如荊州聲山夏

重德尹學菴諸君皆歷通顯負重名聲山德尹每
為子言君乃查氏亢宗之子具不世才而未展其

用子甲申假旋道出津門與君相見接其言論津

采握手傾服如平生歡今予已大耋乞歸君亦年
將古稀矣片帆南下秋氣初澄可以停橈過訪一

覽斯園之盛則又子之幸也君喜交遊重然諾凡
四方士大夫以及文人名士偶有經過周旋傾倒

無倦色以故賢豪長者多樂歸之而斯園亦因以
得名昔鄭當時置驛以通賓客陳遵讌會賓朋投

轄使不得去孔北海座上客常滿樽中酒不空古
今以為美談然諸公皆貴仕登朝人自趨之君身

在湖海無可憑藉而高情曠度使聞風者罔不愛
慕且有園亭池館之勝良辰美景詩酒留連歌詠

太平傳為韻事較之三子又孰多而孰少耶况君
優游泉石養素怡神則將與羨門比壽王喬爭年

而斯園乃塵世之丹邱且令人可望而不可即也
是為記雍正癸丑九月之朔時年八十有二 蔡

啟盛案今又為南運河神廟中尙有
高廟御筆碑旁地列肆蒔花皆寺僧所做合之誠可百畝

也許也

棗香村在城南五里又名南莊童氏別業

光緒戊戌

懷園在城東南四里王氏別業

南溪在城東南隅牛氏園也曲通濠水樹柳掩映

宛有江南村落風景舊爲康氏園

浣花村在水西莊對岸少東遵化州知州杜甲所

居里名

楊園在城西三里許與水西莊相近

郭園在城東南四里懷園對岸郭氏別業

問蓮浦在城西二里野水瀾漫周遭皆種芙蓉中

有水軒數楹以供遊覽今廢

老夫村在開口下龍氏別業舊名甯園

七十二沽草堂在鍋店街後門臨大河梁氏別墅

耳亭在西門外演武廳右月隄上康熙閒天津道

朱士傑建亭四周環植楊柳炎日絕無暑氣遊者

忘返今廢

帆齋在三岔河口笨山張氏讀書處又有琴海棠

雲厂閱耕堂茶圃欵乃書屋舊雨亭蝶巢豔雪龕

詩星閣卧松館諸勝大半圯廢

虛舟亭在城南一里許與海光寺相近宋氏別業

也平橋曲榭蘆葦紛披景極幽邃夏時荷開繞亭

望之爛如雲錦

領南軒在城內西北隅名山金氏別業

篆水樓在城外東北隅樓臨三义河口俱同上

望海樓在東城外新通志

銅硯齋在縣境易州農夫耕田獲古錢盈釜石硯

一硯背飾以銅硯佳而製古鄭君宮調得之以贈

津門吳進士念湖遂以名其齋小峴山人集

青縣

參戶故城在縣南漢元朔三年封河間獻王子免

為侯國屬勃海郡後漢省水經注城水東北逕參

戶亭應劭曰平舒縣西南五十里有參戶亭故縣

也世謂之平虜城元和志參戶故城一曰木門城

在長蘆縣西北四十里寰宇記在縣城西北四十

六里輿地志云中有大樹因名木門舊志木門鎮

在今縣西南三十里蓋以故城得名大清一統志

俞宗濂按元和郡縣志參戶故城一名木門城在

長蘆縣西北四十里唐之長蘆縣即今滄州城今

滄州西六里即至青縣界則參戶故城在青縣境

無疑青縣城在滄州西北七十里其東南三十里

有木門城今稱木門店數與元和志合即漢之

參戶也滄州志亦載有參戶故城云舊志作木門

城引方輿紀要在滄州城西三里此隋之長蘆

縣故城因舊唐書云漢置參戶後周改長蘆遂謂

光緒戊戌

隋之長蘆在河西唐移治河東熙甯所省實今之州治也

乾甯故城今青縣治

蒲領城在縣界寰宇記水經注云魯城縣西北六十里漳河西岸有北蒲領故城蓋漢末黃巾之亂有蒲領人流寓於此遂立此城非漢縣也按今水經注無此文其漢蒲領縣詳見河間府阜城縣興濟故縣在縣東南三十里衛河東岸本范橋鎮地金初置縣屬滄州大定六年改屬清州元至元二年併入會川縣後復置屬清州明初仍屬滄州國朝順治六年併入青縣

俱同上

會川廢縣河間府志在青縣境舊土城宋析永安縣置乾甯縣即此大觀元年八月乾甯軍河清七日改清州今廢諸司治所猶有存者方輿紀要今青縣治後周置永安縣宋曰乾甯熙甯六年省為鎮元符二年復舊崇甯三年再省政和五年又復金人改曰會川元因之明初省按志言大觀元年河清七日改會川為清州附郭據金地理志會川本名乾甯貞元二年更名宋安得有會川特刪

之前志

空城在縣西北十五里相傳楊景屯兵處

蘆臺故城河間府志在青縣境衛河之西南週迴三十二里唐於此置蘆臺軍遺址尙存太平寰宇記在青縣南乾甯軍本古蘆臺軍地其蘆臺故城在御河南七十步方輿紀要在青縣東衛河西岸九域志云在滄州西北九十里唐置蘆臺軍其城周三里後廢爲馮橋鎮乾甯中復置蘆臺軍亦曰乾甯軍光化三年幽州帥劉仁恭以滄州爲汴將葛從周所圍將兵赴救營於乾甯軍從周留別將守滄州砦自將精兵逆戰於老鴟隄大破之五代梁開平二年劉守文以其弟守光篡逆舉滄德討

之軍於蘆臺爲守光所敗乾化三年晉將周德威攻燕拔其蘆臺軍後唐同光以後以契丹屢入寇蘆臺瓦橋皆增設重兵命將戍守天成二年蘆臺戍軍亂尋擊平之石晉初沒於契丹周顯德六年親征契丹命大帥韓通將前軍自滄州治水道入契丹境柵於乾甯軍南通奏補壞防開遊口三十六遂通瀛鄭旣而周王至乾甯契丹甯州刺史王洪舉城降宋白曰軍城東臨御河接滄幽二州之境周世宗由此復關南自是常爲戍守重地鈞臺寨方輿紀要在青縣北六里宋置砦於此設

兵戍守又有獨流北獨流東二寨俱在縣境以濱
 獨流河而名皆宋人所置金廢宋史地理志釣臺
 砦獨流北砦獨流東砦當城砦沙渦砦百萬砦俱
 隸清州乾甯舊縣
 堅固砦方輿紀要在青縣南唐太和二年李同捷
 據滄景叛易定節度使柳公濟討之奏拔其堅固
 砦唐書時同捷築砦於滄州西抗拒官軍以堅固
 為名

范橋鎮金史地理志在會川縣

長蘆鎮新饒安鎮舊饒安鎮乾符鎮郭疇鎮郭橋

鎮金史地理志在滄州橫海軍清池縣

永濟隄唐書地理志清池縣西北五十里有永濟

隄二永徽二年築

永濟北隄唐書地理志在清池縣三十里開元十

六年築

明溝河隄唐書地理志清池縣西四十五里有明

溝河隄二永徽三年築

李彪淀東隄徒駭河西隄唐書地理志皆在清池

縣西五十里永徽三年築

衡漳隄唐書地理志清池縣西北六十里有衡漳

隄二顯慶元年築

衡漳東隄唐書地理志在清池縣西北六十里開

元十年築

浮河隄陽通河隄唐書地理志皆在清池縣南十

五里開元十六年築

老鷗隄方輿紀要在青縣東南舊築隄於此防衛

河泛溢以形似名汴將葛從周敗劉仁恭處也俱同

上

神隄河間府志在青縣南衛河隄上有柳數百株

永樂間知縣王彬以河決盡沒民居痛不能救投

水而死屍漂入縣甬道官民憐之遂置祠隄上名

曰神隄

前志 蔡啟盛案縣志惟王彬作王宏毅以外一字不異應據彼正此說詳宦績門

古隄周迴城北西南三面

龍窩在縣城外臨河明昭聖皇后誕毓處宏治中

敕建宮於梓里御製匾額曰龍窩俱同上

河倉一在清州會川縣一在滄州清池縣一在滄

州南皮縣金史地理志

豐臺在興濟廢縣東有高臺名豐臺或以為望歲

而作遺址猶存今縣治東四十里有豐臺堡縣志

峭帆亭在青縣蘆臺城中舊通志

重刊天津府志 卷三十三 古蹟 三
激江亭在叔河之西縣志

際槎軒在東河岸久廢同上

靜海縣

窩子口今縣治金史地理志明昌四年以清州窩

子口置靖海縣舊志有古城在縣南二十里清一大

統志

當城方輿紀要在楊柳青北十里小直沽南三十

里宋志之當城砦也成平中議者以北河可涉宜

有城守以備北邊詔築城其地謂之當城郭謚曰

決黃河御河之水下注當城是也前志

鳳凰臺在靜海縣西五里舊通志

閱臺在靜海縣衛河西四十里同上

釣臺在靜海縣南相傳為太公望釣魚處宋時置

砦於此名勝志按畿輔通志有釣魚臺在南皮縣四

十里相傳呂尙囚棘津時釣此又謂釣臺在青縣

北六里以今地輿考之當在青縣靜海界上前志

滄州

滄州故城在州東南漢置浮陽縣以在浮水之陽

為名後漢建武十五年封劉植兄歆為侯國屬勃

海郡後魏太和十一年改置浮陽郡屬瀛州景明

初罷并章武熙平二年復置郡屬滄州後移郡置
饒安以浮陽屬之隋開皇十八年改名清池因作
清池為名唐武德元年移滄州來治其年州移饒
安四年以縣屬景州五年屬東鹽州貞觀元年復
自胡蘇移滄州來治宋金元皆以清池為州治明
初始省入州又徙州治長蘆明一統志滄州故城
在今州東南四十里舊志一名卧牛城亦名獅子
城 大清一統志
長蘆故城今州治本漢參戶縣地後周大象二年
置長蘆縣以水為名隋初於縣西北三里置漳河

郡以縣屬之郡尋廢十六年置景州大業三年廢
屬河間郡唐武德四年又置景州五年置總管府
貞觀元年州廢屬滄州舊治永濟河西開元十四
年大雨漂沒十六年移治河東一里宋乾德二年
廢入清池後復置熙甯四年又省為鎮入清池明
永樂初移州治於此

浮水故城在州東隋開皇十六年分高城縣置大
業初仍省入唐武德五年又置屬東鹽州貞觀元
年省十二年移饒安縣治此屬滄州宋熙甯四年
省為鎮入清池金史地理志清池縣有新饒安鎮

卽此府志浮水故城在州東五十里案此城自貞觀中爲饒安縣元和志寰宇記皆以饒安爲在州南九十里然考浮水東北流未嘗南出當從府志在州東爲是其在州南者則是干童城也

乾符故城在州東北漢置曰章武縣文帝後七年封竇后弟廣國爲侯國屬勃海郡魏志嘉平元年杜恕徙章武郡蓋魏初置郡也晉移郡治東平舒以縣屬之後魏太和十一年改屬浮陽郡高齊省隋開皇十六年改置魯城縣屬河間郡唐武德四年屬景州貞觀元年改屬滄州元和志縣南至州

一百里寰宇記隋置魯城縣取長蘆縣北平虜城爲名仍改虜爲魯唐乾符元年縣東北有野稻水穀連接二千餘頃燕魏飢民悉來掃拾俗稱聖米

二年敕改爲乾符縣周顯德二年併入清池九域

志清池縣有乾符寨金史地理志清池縣有乾符

鎮舊志故城在州東北八十里名勝志魯城在州

東北七十里又三十里爲乾符城案寰宇記以乾

符爲後魏所置之西章武而以漢章武爲在其州

東南鹽山縣西北近志又以漢章武在大城縣參

考道里蓋此爲漢章武在大城者乃西章武也按鹽

山縣志云此城距鹽山迤北一百二十里

章鄉廢縣在州東南漢置元始五年封謝殷為侯

國屬渤海郡後漢省寰宇記十三州志云饒安縣

東南二十里有童鄉亭即故縣童與章字相類也

鹽山縣志定縣章鄉故城考舊志漢時定縣在今境乃輿地紀要定縣屬渤海郡武帝封齊孝王子越為侯邑河間府志謂後漢省入高城其說郡國志無明文水經注引應劭曰饒安縣東南三十里有定鄉城故縣也屯氏別河北瀆自重合城南東逕定縣南考今山東樂陵南有重合鄉饒安即舊縣其東南皆樂陵地矣前志刪之甚是紀要以定縣入滄州亦誤通志章鄉廢縣在滄州東南漢置渤海郡後漢省寰宇記十三州志饒安縣東南二十里有童鄉亭即章鄉也應在今樂陵地舊志載入鹽山境蓋因誤以卯今城為饒安耳應刪之

中邑廢縣在州界漢高后四年封朱通為侯國屬

於渤海郡寰宇記後漢省併浮陽今長蘆縣地

燕留城在州東北史記燕莊公二十七年山戎來

侵齊桓公救燕遂北伐山戎而還燕君送桓公出

境桓公因割燕君所至地與燕括地志燕留故城

在長蘆縣東北十七里即齊桓公所與燕君地因

築城名曰燕留

麻姑城在州北魏書地形志章武縣有大家姑祠

俗云海神或云麻姑神寰宇記廢乾符縣界有麻

姑城郡國志云漢武東巡至此祀麻姑故名俱同上

定縣故城方輿紀要在舊饒安東南三十里漢屬

渤海郡武帝封齊孝王子越為侯邑後漢時省入

饒安縣前志原註河間府志作定城

重合故城河間府志在滄州治東至樂陵縣五十

里本漢縣名屬渤海郡北齊省上同

竈兒坡在定縣城東北百里居民於此煮鹽為業

因名建文二年盛庸等遣將分兵屯滄州燕王曰

滄州土城潰圯日久修之不易當乘其未備急攻

之遂由通州至直沽謂諸將曰彼所備者惟青縣

長蘆今博垛兒竈兒坡數程無水彼不為備趨此

可逕至滄州城下乃一日夜兼行三百里掩至滄

州遂克之又有馬落坡在州東北二十五里元嘗

置巡司於此方輿紀要

金隄滄州志即今衛河金人築元初復廣之前志

合口方輿紀要在滄州西水經注衡漳水過渤海

建成縣又東左會滹沱別河故瀆又東北入清河

謂之合口晉太元十三年後燕慕容楷等將兵會

慕容隆於合口擊叛將張申於高城平之隆安二

年魏拓跋珪得河北置行營於中山命拓跋遵鎮

渤海之合口即此

馬落坡滄州志在城東北昔有巡檢司世傳小秦王逐鹿落馬處

望海市臺畿輔通志在滄州東四十里滄州志周

穆王乘八駿東遊海上築之以望海市故名俱同上

望海臺在州東北一名漢武臺水經注清河枝津

東逕漢武帝故臺北魏氏土地記曰章武縣東一

百里有武帝臺南北有二臺相去六十里臺高六

十丈俗云漢武帝東巡海上所築唐實錄貞觀十

九年太宗自高麗班師次漢武臺顧問侍臣對曰

是燕齊之士為漢武求仙處舊志望海市臺在州

東四十里又有武辛臺在鹽山縣東北七十里水

經注浮水所經蓋南臺也大清一統志

東文昌祠臺州志在滄州治東周世宗築此以為邊

堠方輿紀要

狼煙臺周世宗築在長蘆縣內即今州治州志

歇馬臺周世宗立遺址在舊城內同上

掠馬臺在滄州同居鎮長蘆鹽法志

仙人臺在惠民場西北舊有仙人對局棋盤今無

州志

盟亭在州南寰宇記廢長蘆縣有盟亭古燕齊之

界二國嘗盟於此故名

大清一統志

望瀛樓在滄州西門外舊志一州之觀久廢

河間府志

清風樓在滄州晉泰康中建元薩天錫錄囚駐節

於此有清風樓詩

舊通志

南川樓在南關昊天觀後今廢

州志

朗吟樓在南關衛河之滸每至夏日郡人多遊息

宴樂於此

將相鄉在舊滄州東南有程家林以唐程日華父

子相繼居此故名

俱同上

仵清池在舊清池縣東南十八里

方輿紀要

八角井在仵清池北天旱禱雨甚應

州志

浮陽縣大蓮淀北魏延興初淀水溢注破仵清村

因瀦為池今名大梁五龍堂其流西踰東光東至

海齊乘以為古之胡蘇河也

輿地志

按滄州志稱在

舊州東南十五里魏延興初大蓮淀水溢注破仵

清村為池又故老謂仵龍注雨淋漓八日夜陷清

池縣因建仵龍堂砌八角琉璃井昔有白魚浮沈

作龍狀每大旱禱雨輒應

前志

白兔村在城東周世宗出獵見白兔逐之未獲明

永樂十六年鄉人龐喜得之以獻

州志

甘井在舊城唐書地理志在清池縣舍令毛某母老苦水鹹無以養縣舍穿地泉湧而甘民謂毛公

井上

南堂在舊滄州東北一百三十餘步有古碑仆地

金大定十年建立字多缺落今攷殘文及詢故老

以為前代草木叢茂虎狼害人有一僧騎白驃云

自西方來去虎狼之害後不知所終居人因立南

堂奉祀又立中堂北堂以分祈禱多應

河開府志

南堂窪在滄州北去中堂窪四十五里有碑云興

唐大定十年敬德修嘉靖二十三年重修

前志

蘆池在滄州分司公署前有池一方蘆葦甚茂中

架木橋以通來往長蘆之名昉於此相傳宋包孝

肅公為轉運使時池中羣蛙喧沸公示禁之至今

蛙出池則鳴入池則默其威懾之遠如此

長蘆鹽法志

南皮縣

南皮故城在縣東北秦置縣漢元年項羽聞陳餘

在南皮環封之以三縣號成安君文帝後七年封

竇彭祖為侯國屬渤海郡後漢為郡治建安中曹

操擒袁譚於此魏文帝為五官中郎將射雉南皮

亦此地也闕駟曰章武有北皮亭故此曰南皮

水經

注衡漳左會滹沱別河故瀆東北入清河 晉魏皆謂之合口又逕南皮縣之北皮亭是也

為郡治 魏書地形志南皮縣有渤海城 東魏移郡治東光又移縣

於今治括地志故城在今縣北四里寰宇記齊桓

公北伐山戎至此繕修皮革因築焉續通典南皮

縣西去景州六十里縣北有迎河河北有故皮城

即漢晉渤海郡治舊河閒府志在縣東北八里大

清一統志

五壘城寰宇記在清池縣西南二里輿地志云漢

宣帝封河閒獻王子雍為景城侯五子分居城中

俗呼為五壘城案南皮縣志縣東北五十里有壘

城村蓋即此

高樂故城在縣東南漢置屬渤海郡武帝封齊孝

王子為侯國後漢省水經注無棣溝經樂亭北又

東逕新鄉城北即地理志高樂故城也寰宇記故

城在南皮縣東南三十里今謂之思鄉城亦曰西

鄉城縣志即今董村鎮

北皮城在縣東北水經注清河又北逕皮城東地

理風俗記曰南皮城北五十里有北皮城

平城河閒府志河閒獻王子禮封國在今南皮縣

臨津故城河閒府志在南皮縣南五十里今名臨

津店縣志云今為村宋熙甯六年省臨津縣入南皮方輿

紀要臨津城在縣西南六十里本東光縣地東魏

置胡蘇縣於此為渤海郡高齊廢一云高齊置後

周廢隋開皇十六年復置胡蘇縣屬德州劉煦曰

縣置於胡蘇亭因名唐武德四年屬觀州六年改

屬滄州又移滄州治焉貞觀初滄州移治清池胡

蘇縣還屬觀州十七年州廢仍屬滄州天寶初改

為臨津縣貞元二年改屬景州州尋廢還滄州天

祐五年仍屬景州五代時又改屬滄州宋初因之

熙甯六年省入南皮縣為臨津鎮今臨津店俱同上

舊縣鎮方輿紀要在南皮縣東南三十里或云即

晉新樂舊治前志

馬明鎮金史地理志在滄州南皮縣同上

曹公固畿輔通志在南皮縣東南二里曹操因京

兆雋不疑冢為固以攻袁氏因名舊通志在縣東南

二里舊志云漢青州刺史雋不疑冢也高五丈有

奇曹操攻袁譚因冢為固故名方輿紀要

醮友臺在南皮縣北半里舊通志魏文帝與吳質等

重遊南皮築此臺醮友故名又名射雉臺太平寰宇記

石苞臺在南皮縣南十三里舊通志

觀臺在南皮縣東四里

舊通志

袁譚所築魏武擒譚

於此

太平寰宇記

又名袁侯臺舊志誤以射臺當之立

石其前更為取京觀意大謬

縣志

封臺在縣東五十里張二橋東古封鉅所居

同上

五龍鄉在南皮縣南五十里相傳有五龍見於此

日有雲氣覆於上禱雨輒應

河間府志

寒冰井在西南百步傳為黃帝時穿之云伯益所

修即魏文帝沈李浮瓜處

縣志

古益井在五龍岡下時見雲霧為傳說所穿亦名

覆盆井

同上

石崇宅在南皮縣城內

舊通志

王早居在壘城村東今仍呼早王家

縣志

范丹居在古皮城西蓋當年避黨錮之禍因投棲

於此

同上

刁公樓在縣東南七十里一名尙書樓晉尙書刁

協故居

舊通志

高適故里在南皮縣東南六十里今改夜珠高家

同上

遇土亭在縣西北三里相傳暴勝之遇雋不疑處

大清一統志

魏家莊畿輔通志在南皮縣西六里元至正年董
搏霄守長蘆屯兵於此方輿紀要元至正十八年
董搏霄守長蘆屯兵魏家莊為山東羣盜毛貴所
襲戰死處也前志

鹽山縣

高城故城在縣東南漢縣寰宇記鹽山縣在滄州
東六十里本春秋無棣邑漢置高城縣故城在今
縣南四十里按水經注浮水首受清河於浮陽縣
界東北經高城縣之苑鄉城北又東
經章武縣之故城北又東經饒山北魏土
地記曰高城東北五十里有饒山長七里高齊天
保七年移於今地隋開皇十八年改為鹽山縣以

東南鹽山為名縣志舊城鎮在縣東北三十里明
洪武九年移治香魚館大清一統志今治東南

二十里形勢基址今猶完整漢書巴肅傳注高城
故城在今滄州鹽山縣城南方輿紀要謂縣南六
里疑有脫字漢縣治此劉煦曰舊縣在縣南是也晉書

慕容儁載記趙故章武太守賈堅率郡兵邀慕容
評戰於高城評擒之於陣斬首三千餘又慕容儁
以賈堅為樂陵太守治高城苻丕載記以高城侯
苻紹為鎮東將軍督冀州諸軍事進爵郡公紹先
以高城降慕容垂聞丕稱尊號遣使謝罪皆即此

城縣志為卅兮城者卅兮之誤誤於千童字義相近前論之詳矣若高城卽舊饒安之說尤屬無稽攷漢書渤海郡屬有高城千童後漢改千童曰饒安與高城無干晉魏周隋皆兩縣並立高齊移高城於大留里隋改縣名曰鹽山其時饒安自在唐遷饒安治所宋廢為鎮與舊饒安鎮並入清池史有明文清池今之滄州其時鹽山亦自在何得謂高城故城卽舊饒安乎謬甚

千童故城今舊縣鎮本秦縣前漢屬渤海郡後漢改曰饒安輿地志因高城縣東北境書有卅兮城指為千童故縣方輿紀要及府縣志從其說遂併卅兮饒安千童為一城謬甚蓋千童縣城在今治西南五十里與東北卅兮城遠隔一百二十里何

容相混

同上

按水經注無棣溝枝瀆上承無棣溝

南經樂陵郡西又東南經千童縣故城東史記建元以來王子侯者年表曰故重也一作千鍾漢武帝元朔四年封河間獻王子劉陰為侯國應劭曰漢靈帝改曰饒安也滄州治再案魏書地形志滄州浮陽郡饒安縣注云二漢屬渤海前漢曰千童靈帝改饒安有無棣溝西鄉茅蕉冢據此則後魏之滄州治在饒安卽漢千童縣也

新通志

饒安故城一舊縣鎮距今治五十里卽千童故城

戰國時屬齊

史記趙龐煖攻齊取饒安

漢為千童縣

一統志云在滄州東

南漢元朔四年封河間獻王子擔為侯國屬渤海郡東漢靈帝時改置饒安

縣大清一統志北魏屬浮陽郡熙平二年置滄

州治焉一統志云後又為浮陽郡治隋開皇初郡廢仍屬渤海郡唐初

移縣治故干童城州治亦從徙貞觀中又移縣治

故浮水城一統志云此城遂廢一新縣鎮即浮水城距今治

三十里隋析高城地置浮水縣後省入鹽山城即高

唐武德元年復析鹽山地置之後又省入鹽山貞

觀十三年移饒安縣治於此宋熙甯中因避河患

又移治於張為村縣旋廢為鎮併入清池今滄金

史清池縣有新饒安舊饒安鎮也周隋以前之饒

安干童故城即舊縣與高城本屬兩縣自唐貞觀以後饒

安移治浮水今新縣鎮宋熙甯時省入清池

國朝雍正初以舊縣鎮二十七村莊撥歸鹽山鹽山

始兼干童改置之饒安矣縣志

章武城在縣西北漢縣屬渤海郡東漢省晉為章

武國後魏置章武郡隋開皇初郡廢河間府志

按縣志漢為定縣柳縣為高城為干童為章武據

畿輔通志縣本漢高城又有柳縣故城縣志又有

卬兮城卽干童則以為高城柳縣干童縣可也若縣

之章武城本舊志說方輿紀要非之謂章武城在

大城縣蓋卽元魏章武郡城及西章武縣城也若浮陽郡之章武縣城卽滄州之乾符故城俱不在

鹽山前志案縣志有章武考駁此亦自有據因文繁不具錄

柳縣故城在縣東漢元朔四年封齊孝王子陽己

爲侯國屬渤海郡後漢省水經注浮水東北逕柳

縣故城南地理風俗記曰高城縣東北五十里有

柳亭又名柳邱故縣也世謂之辟亭非也寰宇記故柳

城在鹽山縣東七十里縣志在縣東五十里大清一

統志

卍兮城在今治東北七十里輿地志高城東北有

卍兮城秦始皇遣徐福發童男女千人至海求蓬

萊因築此城僑寓男女號曰卍兮漢因置千童縣

後漢改曰饒安府縣志皆從其說考水經注無棣

溝又東逕新鄉城北地理志之高樂故城也開今

皮董溝分爲二無棣溝幹又東逕樂陵郡北又東

屈而北出又東轉逕宛鄉故城南又東南逕高城

縣故城時縣城尙未遷徙故字疑衍南與枝瀆合枝瀆上承無

棣溝南逕樂陵郡西又東南逕千童縣故城東史

記王子侯表故重也一作千鍾靈帝改曰饒安也

滄州治又南東屈東北注無棣溝幹又東北逕功

城北又東北逕鹽山入海約二溝大勢皆由西南而東北幹瀆自樂陵北歷逕高城南枝瀆逕樂陵西又東南逕干童縣東辨其形方枝瀆在南幹瀆在北干童實在高城西南輿地志謂干童在高城東北因以卬兮城當之或將無棣溝之幹瀆枝瀆作一水讀則言逕干童城在高城後且干童與卬兮義近致有此誤而曰重曰鍾則又何說况高城東北爲卬兮南爲樂陵人皆知之水經明云樂陵郡西又東南逕干童如指卬兮爲干童是樂陵應在高城西北方向不合舊唐書武德元年移饒安

治於平童

卽干童

故城貞觀十二年復移治於浮水

故城故有舊饒安新饒安之稱宋俱廢爲鎮併入清池今史清池縣有舊饒安鎮新饒安鎮是干童爲饒安縣卽今舊縣鎮其說明甚與卬兮城毫無干涉又何得以卬兮城當干童而統指之爲饒安縣耶惟卬兮城之名傳之已久如境中宛鄉城合騎城雖非古時縣邑而因事立城或自有說在也

縣志

平津故邑在縣南漢書恩澤侯表平津侯公孫宏元朔三年封在高城括地志平津鄉在鹽山縣南

四十二里大清一統志

合騎城在縣北漢書功臣表合騎侯公孫敖元朔

五年封在高城舊志在縣北七十五里今訛為鄆

隄城同上

宛鄉城今無考案水經注浮水自浮陽東北逕高

城縣之宛鄉城北又東經章武縣之故城北又無

棣溝逕樂陵郡北又東屈而北出又東轉逕宛鄉

故城南考此城與漢章武縣城約其方隅均在鹽

山西北境而章武名最著宛鄉侯封故祇稱城固

不同章武故城之可名故縣也縣志

伏猗城長蘆鹽法志在鹽山縣韓村北相傳猗盧

甚盛特築此城以防之志語未甚明晰考元魏之

先有猗盧者居定襄之盛樂地與鹽山隔遠晉懷愍時日

盛而患於帝室會遣兵助戍晉陽勿庸設戍防之

也此城之築載鹽法志或葦蘆盛時藉以防梟徒

歟俟考

功城水經注在無棣溝東北經故城北世謂之功

城也又東北逕鹽山入海

甘羅城在望樹鎮西南故址尙存旁有讀書臺相

傳秦甘羅會寓此臺讀書俱同上

傅家營方輿紀要在鹽山縣南五十里又南接山

東海豐縣境舊置戍於此前志

雞籠鎮河間府志在鹽山縣南

海豐鎮海潤鎮利豐鎮幞頭鎮金史地理志在鹽

山河間府志海豐鎮在鹽山縣北九十里瓦礫成

嶺綿互里許

大留里河間府志鹽山舊縣治此俱同上

武帝臺在縣東北七十里韓村鎮東三十里此南

臺也舊通志

香魚館河間府志洪武二年吳文靖自大留里移

鹽山縣居於此按卽今書院猶沿其名明陶安徵

時嘗夜行至香魚館詩以記事時在元末縣尙未

移治也府志謂卽舊城誤矣縣志

拱辰臺在城北高出城垣今圯明粹廷熙拱辰臺

圍九里高三丈有奇郭門三上有重樓角樓四敵

臺二十有四巡鋪各一池深澗各丈五尺護城隄

高廣各丈餘周環其外蓋鉅邑也歲久城駸就圯

傾天津兵憲隴西曹公按部於鹽以城守爲亟務

下檄鹽部應州王君允葺之時王君方視篆則偕

邑史江右謝君賜宣力効勞繕雉堞濠塹越三

月城復巍然視昔加完美焉城北舊有小墩臺爲

邏卒瞭望之所君病其陋拓而崇之址廣三十尋

而餘高出城垣五尺許作亭其上勢甚雄壯落成

舉燕爵子廷熙登焉極目浩漭顧瞻徘徊恍然有

古人江湖廊廟之想乃命其臺曰拱辰云曩薛子

讀天文書惟極辰居太乙帝座之中其外爲列垣

光緒戊戌

又其外為九垓八柱精耀相屬動若轉轂故孔子曰居其所而眾星拱之以象君道立臣極也國家定鼎西北六合之內大都小邑星羅棋布即遐陬僻壤咸興拱極之思矧鹽為畿甸近輔尺五神京耶是故登斯臺焉仰瞻魏闕體九重宵旰之心兢焉奉將德意以奠蒼赤收牧甯則長城保障若增而高庶幾哉不負斯臺之義矣於是王君拜謝曰趨哉先生言允不敏敢不三復斯義遂扁而揭之辭子問人監學鹽校於官為古外史得記其事時隆慶二年冬十月望日也

王忠肅公居第忠肅公居第三十餘年不改於舊

英宗特命有司起第於縣西有司承媚於外多列

屋若干公曰此非詔旨也悉拆去俱同上

慶雲縣

無棣故城在縣東相傳卽管仲所謂賜履北至於

無棣者隋開皇六年分陽信饒安二縣地置屬渤海郡唐屬滄州宋治平元年移治保順軍而故城

廢元初又分其西界於故城置縣仍屬滄州齊乘

謂西無棣縣明永樂初始改今名舊志故城在今

縣東微南五里高津河東南元末毀於兵明洪武

六年知縣楊思義移治高津河北岸卽今治案元

和志無棣縣西北至滄州一百二十里今慶雲縣

在州東南一百五十里然唐時滄州治清池在今

州東南三十餘里則去無棣正一百二十里也宋

志周置保順軍於無棣縣南二十里治平元年徙

直隸天津府志

無棣縣於此今海豐縣在慶雲縣東南四十里縣志有故城在其縣西北二十里去慶雲正二十里則卽周爲保順軍宋爲無棣者也縣志以隋無棣在慶雲宋無棣在海豐其說甚覈從之大清一統志荻苴城在縣東接海豐界與無棣城相對覆鹵河界其中相傳爲龍且所據俗名龍且城舊縣志云在縣東城下舊有荻苴河直抵海豐縣漢武帝封朝鮮降將韓陶爲荻苴侯疑邑於此方輿紀要按前漢書功臣表荻苴侯韓陶以朝鮮相將兵漢圍之降侯五百四十戶據此可知俗傳之誤或又云龍且

城言當時龍且所據考漢書韓信已定臨淄東追齊王項王使龍且將兵救齊進與韓信夾濰水而陣一統志曰濰水在安邱諸城界韓信與龍且夾濰水而陣卽在此與今地杳不相及也前志韓信壘在慶雲縣南二十里與荻苴城相對相傳韓信自趙下齊道經於此俗呼掛甲口舊通志板達營方輿紀要慶雲縣南二十里志云宣宗征高煦時駐蹕於此前志

治劍營縣志在閻家務河塢鐵滓纍纍如邱山相傳歐治子鑄劍處河間府志同

鐵匠營河間府志鹽山縣鐵匠營在閻家務河壩

鐵滓纍纍相傳元海運時治鐵處 按二說相似

又並在閻家務而治鐵之代不同此似有傳會處

姑依志並存之 案閻家務今屬慶雲非鹽山

分水鎮金史地理志在滄州無棣縣

長城隄方輿紀要慶雲縣南四十里勢如岡陵舊

志以為齊之長城或云禹所築九河隄 俱同上

漢王臺晉時漢劉恢為渤海所建 長蘆鹽法志

延陵臺在慶雲縣西南七里 舊通志

文星臺在慶雲縣東南隅舊志高可遠眺清曉見

日出海烟然奇觀也 同上

景星臺在慶雲縣城北 河間府志

觀瀾亭在鬲津南 縣志

秀野亭在慶雲縣城東 河間府志

慶雲館在慶雲縣治 同上

真味堂宋李之純故宅在縣境 新通志 宋李之純詩問渠真味若

為傳不著鹽梅也自全龜鼎大夫徒染指麴車公

子漫流涎胸中已有五千卷嶽外更聽三兩絃此老清饒何所嗜宦途嚼蠟幾多年

鬲岸古樹在慶雲縣西里許皮色如鐵枝曲折如

虬龍狀陰可數畝蒼古離奇直出雲表中微有痕

相傳唐宋時挽纜跡也河間府志

附錄前志

九河故道禹貢兗州九河既道北過涿水至於大

陸又北播為九河同為逆河入於海爾雅九河徒

駭太史馬頰覆釜胡蘇簡潔鈎盤鬲津郭璞注簡潔為二河

朱子孟子集註同孔安國書傳河水分為九河在兗州界

平原以北是孔穎達禹貢疏計禹九河云復其故

道則名應先有不宜徒駭太史因禹立名或九河

雖舊有名至禹治水更別立名鄭元云周時齊桓

公塞之同為一河今河閒弓高以東至平原鬲津

往往有其遺處春秋緯寶乾圖云移河為界在齊

呂填闕八流以自廣鄭元蓋據此文為齊桓公塞

之也言闕八流拓境則塞其東流八枝併使歸於

徒駭也漢書溝洫志許商云古記九河之名有徒

駭胡蘇鬲津今現在成平東光鬲界自鬲津以北

至徒駭其間相去二百餘里又王橫云往者天嘗

陰雨東北風海水西南溢出浸數百里九河之地

已為海所漸矣邢昺爾雅疏九河之次從北而南

既知三河之處則其餘六者太史馬頰覆釜在東

光之北成平之南簡潔鈎盤在東光之南鬲縣之

重刊大清一統志 卷三十三 古蹟
北也蔡氏書傳九河一曰徒駭二曰太史三曰馬
頰四曰覆釜五曰胡蘇六曰簡潔七曰鉤盤八曰
鬲津其一則河之經流也

欽定書經傳說彙纂漢氏近古止得其三唐遂得其六歐

陽恣輿地記又得其一或新河而載以舊名或一
河而互爲兩說要之皆似是而非又云九河已湮
漢唐以來諸儒就所見之斷港絕潢指爲某河某
河是非不可知然河自大陸以北順勢下趨禹時
九河自當在德州以上河閒數百里之地余氏闕
云自周定王時河始南徙而禹之故道失矣西京

時河入千乘而無棣之閒又播爲八漢人指以爲
太史馬頰者偶合於禹迹故訖東都至唐河不爲
害者千數百年名山藏徒駭等河故道皆在河閒
滄州南皮東光慶雲獻縣山東平原海豐甯津吳
橋諸處直達東海通典九河四在景成一在平原
其太史簡潔未詳畿輔通志漢世近古諸儒考據
精博緯圖中候非盡無徵至許商以奉命行視圖
方略韓牧亦以能治河徵而或止得其三或僅求
其四五則其餘之湮滅可知也唐宋以後去古寢
遠舊迹日湮而杜佑通典李吉甫元和郡國志歐

陽恣輿地廣記樂史太平寰宇記於徒駭胡蘇鬲
津之外又得馬頰鉤盤覆釜簡潔四河惟太史未
詳所在千年以前求之而不得千年以後竟一一
犁然有其處所此可信乎抑不可信乎蔡沈曰或
新河而載以舊名或一地而互爲兩說皆似是而
非無所依據斯言誠是然據許商所云三河旣實
有其地而孔穎達亦云九河之次自北而南旣知
三河之處則其餘六者當亦在成平東光鬲縣之
南北今考河開府交河縣東有成平故城東光縣
東有東光故城山東德州北有鬲縣故城皆漢縣

也川原平行沮洳盈望九河舊迹要亦不離此域
然或爲平疇或存枯瀆無論禹時故道不可復問
卽漢世所謂三河者亦在有無斷續之間矣禹貢
雖指林氏曰王介甫謂逆河者逆設之河並時分
流也其意以同爲逆河句釋上文播爲九河之義
如此則逆河卽是九河矣羅泌曰聖人於冀兗間
逆設爲河以防暴至之患未至則不妨民耕旣至
則不墮民舍程秘曰禹因地之形而逆設爲九河
凡河之道則不見都邑不爲聚落不耕不收故謂
之逆河董鼎曰格言云逆河是開渠通海以洩河

之溢秋冬則涸春夏則泄此皆踵介甫之謬以九
 河爲逆河而緣飾其辭也陳師道曰逆河者爲潮
 水所逆行千餘里邊海又有潮河自西山來經塘
 泊按潮河一名界河在今靜海縣西北受滹沱易
 巨馬三水巨馬卽滹水合御河東至獨流口入海此河
 在直沽口西亦不得指爲逆河明邱文莊濬又言
 當於直沽入海之後依禹貢逆河法截斷河橫開
 長河一帶收其流而分其水以逆河爲橫絕之河
 承西漢之誤以上諸說總由不知渤海卽逆河而
 求逆河於渤海之外遂愈求愈遠耳河間府志南

皮縣九河故道渠岸尙存

徒駭

欽定書經傳說彙纂按今滄州之西交河之東北六十里

有徒駭卽漢滹池孔穎達禹貢疏徒駭是河之本

道東出分爲八枝李巡曰禹疏九河以徒衆起故

曰徒駭郭璞爾雅註徒駭在今成平方輿紀要以徒駭歸獻縣

蓋本邢昺爾雅疏九河之次自北而南唐書地理

志在清池縣西五十里孫炎曰禹疏九河徒衆惕

不成故曰徒駭孔氏云在滄州景成元豐九域志

在故滄州西北二十里元和郡國志在山東齊河

縣景城齊乘河昔北流衡漳注之河既東徙漳自
大海焉知北流之漳非古徒駭畿輔通志今漳滹
沱之經行於瀛滄界者即徒駭故道禹貢錐指今
漳水自鉅鹿又北歷南宮新河冀州東鹿深州衡
水武邑武強阜城獻縣交河青縣靜海大城寶坻
至天津鎮注於渤海即古徒駭河之故道今德平
樂陵齊河濟陽慶雲海豐界有土河志以為徒駭
妄也徒駭最北豈反出高津南哉河間府志徒駭
故道在南皮縣北滄州志在廢清池縣西南三十
里按九河故道數千年聚訟紛紛即徒駭一河已

人各異辭矣但據水經注淇水篇云淇水至東光
縣西南會大河故瀆東北逕泉周縣入滹池又東
逕漂榆邑入海漳水篇云衡水東逕建城縣故城
南衡漳又東左會滹池別瀆又東北入清河謂之
合口則衛河自東光以下行大河故瀆會滹池入
海而漳水自合口以下又與衛河並行大河故瀆
與漢地理志滹池即徒駭之說可相參而得之漢
志滹沱至平舒入海蓋東平舒即今大城縣未嘗
瀕海則所謂至平舒入海者蓋由平舒至章武入
海今子牙河為滹沱下流逕大城縣三角淀與水

經注合則漢志及錐指說信而有徵矣若所謂成平滹池成平今獻縣畿輔通志滹池入獻縣完固口分爲二支則漢志特據河水所經處言之非只謂滹沱第在成平也夫滹沱卽由三角淀入海則自三角淀入縣界至直沽其爲徒駭故道可知特贅此以備一說

太史禹貢疏禹大使徒衆通其水道故曰太史郭

璞爾雅注太史今所在未詳通典及蔡氏書傳說同元史地

理志太史在滄州南皮縣治北明李賢一統志說同齊乘清

滄二州之間有古河隄岸數重太史等河當在其

地方輿紀要在徒駭之東河間府志太史在古皮城南畿輔通志太史河自漢以上未知所在而忽得之于欽李賢自不足據禹貢錐指齊乘清滄之說庶幾得之

馬頰郭璞爾雅註河勢上廣下狹狀如馬頰

欽定書經傳說彙纂山東濟南平原縣北有篤馬河東北

經陵縣德平商河樂陵諸縣界其流或斷或續相

傳卽馬頰河元和郡國志在德州安德平昌二縣

東皇輿表安德今陵縣通典在平原縣界太平寰宇記篤馬

河卽古馬頰河在棣州商河縣北輿地記卽篤馬

河明一統志在東光縣界河閒府志在南皮城南慶雲縣志在縣東南自樂陵西十五里經縣分水鎮至城東南隅入高畿輔通志九河之次自北而南以地計之當在東光境內李賢之說似爲得之其篤馬在九河之南許商有明言何不一考也樂史蓋誤認唐之馬頰爲古之馬頰耳元和郡國志馬頰河久視二年開決亦名新河卽上所引在蓋安德平原者此水卽漢之篤馬河水經所云東北經安德縣故城又東北逕平昌縣故城北者故瀆久湮唐復開名爲馬頰所謂新河而被以舊名者也樂史不解

元和郡國志新河二字之義而指爲九河之一其謬甚矣禹貢雖指德州治安德所領有蓆縣太平寰宇記云馬頰河逕蓆縣是也而又云篤馬河卽古馬頰河人皆斥其謬然唐自有馬頰河出澶州新豐縣界東北流至平昌縣合篤馬河二水合流並得通稱以篤馬爲馬頰不可謂謬謬在一古字指爲九河之第三耳近志平原商河陽信界中並有馬頰河皆唐之馬頰也

覆鬴郭璞爾雅註水中可居住而有狀如覆釜李巡曰水中多渚往而虛形如覆釜方輿紀要鬴亦

重修天津府志 卷之三十三 古蹟
作釜通典馬頰覆釜在平原縣界又云安德縣有
覆釜河

欽定書經傳說彙纂濟南府德州有覆釜河東北至海豐
縣入海滄州志覆釜河在慶雲縣南二十里河間
府志覆釜在南皮縣東南畿輔通志安德故城在
今山東陵縣德平界與甯津相近意覆釜自陵縣
歷甯津南皮而達慶雲平

胡蘇李巡曰其水下流故曰胡蘇胡下也蘇流也
孫炎曰水流多散胡蘇然漢書地理志渤海郡東
光縣有胡蘇亭

郭璞爾雅註作東莞
縣邢昺疏莞當作光

元和郡國志

胡蘇河在饒安縣西五十里太平寰宇記胡蘇河
一名赤河其水赤渾色自臨津治逕饒安無棣入
海齊乘滄州南有大漣澱西踰東光東至海非胡
蘇河歟元史河渠志胡蘇河在慶雲縣西南河間
府志胡蘇在南皮西城下滄州志胡蘇河在慶雲
縣西南十二里慶雲縣志經縣分水鎮東北十二
里會鬲河入海明工部郎中楊旦請開東光慶雲
胡蘇河通海以洩衛河漲水疏下中止畿輔通志
今滄州卽唐饒安慶雲卽唐宋無棣甯津卽漢東
光宋爲臨津縣今其縣西有胡蘇亭正班固所云

重刊天津府志卷二十二 古蹟
在東光者太平寰宇記之言近之矣
簡郭璞爾雅註水多簡易李巡云簡大也其水深
而大也

欽定書經傳說彙纂河閒府南皮縣城外有簡河史記正義簡在次州厯亭縣齊乘滄州大連澱南至西無棣縣有大河名曰沙河皆瀕古隄茲非簡潔等河歟元史河渠志在南皮城外十餘步輿地廣記在臨津方輿紀要簡在渤海河閒府志在南皮城西慶雲縣志在縣南三十里舊河閒府志在滄州臨津縣

按慶雲新志以南皮篤馬河爲簡河亦非臨津今甯津北與南皮接界謂簡潔在此理或有之
潔郭璞爾雅註水多約潔李巡曰河水多山石治之苦潔潔苦也

欽定書經傳說彙纂河閒府南皮縣城外有簡河潔河二河相去甚近金史地理志南皮縣有潔河元史河渠志簡潔在南皮城外方輿紀要在渤海與簡相近河閒府志在南皮縣城西

按何喬遠名山藏河漕記云簡潔一水先儒誤分爲二此蓋指孟子集註言也據書經彙纂云孔穎

達九河疏據郭璞爾雅註以簡潔為二河朱子孟子集註因之曰簡曰潔分舉犁然蔡傳則據會啟之說合簡潔為一河林之奇嘗辨之以為九河勢均安得以一為經八為支派當從孟子集註為正又畿輔通志云簡潔二河爾雅明列為九晉唐宋諸儒紀載相仍蔡傳獨宗歐陽恣之說合之為一未免穿鑿合從孟子集註為二河

鈎盤郭璞爾雅註水曲如鈎流盤桓也李巡曰鈎盤言河水曲如鈎屈折如盤也太平寰宇記在樂

陵東南皇輿表樂陵今武定州樂陵縣屬濟南府從德州平昌來輿地記通

典說同

欽定書經傳說彙纂樂陵鈎盤河自平原德平二縣界流

入至海豐縣東南入海漢書地理志平原郡有般

縣師古注九河之鈎般後漢書公孫瓚傳瓚出軍屯盤河將

以報紹註即九河鈎盤之河其水經注篤馬河故

渠川派東入般縣為盤河蓋亦九河之一也元和

郡國志在陽信縣北四十里金史地理志樂陵有

鈎盤河元史河渠志在獻縣東南八十里禹貢錐

指般縣故城在今德平縣東北河在縣南二十里

近志陵縣德平樂陵商河武定海豐陽信霑化界

中並有鉤盤八枝自鬲津而外此河亦有可據齊
 乘曰東無棣縣北有陷河闊數里疑卽鉤盤河按
 此河自樂陵分爲南北二派海豐舊志云南派在
 縣南名鉤盤河東經霑化縣北又東至久山鎮入
 海新志云北派在縣西北二十里自慶雲流入又
 東北徑馬峪山前抵土河口入海今縣北盤河村
 當以此爲名蓋北派卽齊乘所謂陷河也或曰陷
 河卽篤馬河之別名許商云在九河齊乘指此以
 爲古鉤盤恐非然許商亦就上流言之耳安知篤
 馬下流非卽鉤盤之故道乎河間府志鉤盤在南

皮縣西北慶雲縣志在縣西南自德平西北樂陵
 東南經縣南由海豐霑化至九山人海

鬲津郭璞爾雅注水多峽狹可隔以爲津而橫波
 李巡曰河水狹小可鬲以爲津邢昺曰自鬲津以
 北至徒駭相去三百餘里漢書地理志平原郡鬲

縣平原當以爲鬲津畿輔通志鬲津故城在今
 陵縣西陵縣唐安德也

欽定書經傳說彙纂德州西南有鬲津河東經吳橋甯津

德平樂陵慶雲諸縣界至海豐大沽口入海元和

郡國志鬲津枯河在縣南七十里河間府志古鬲

津河在吳橋南亦名吳川又東逕甯津縣南又東

逕南皮南與山東樂陵分水太平寰宇記樂陵縣
鬲津枯河在縣西三里南皮縣志河在縣東南四
十五里又東逕慶雲縣南金史地理志無棣有鬲
津河又東北逕鹽山縣東南鹽山縣志河自慶雲
北大鹽山界崔家口又東逕海豐入海滄州志在
城南一百二十里俗呼老黃河方輿紀要鬲津在
鉤盤之北通典在獻縣之廢饒安縣輿地記在無
棣元史河渠志在慶雲縣又在樂陵縣西三十里
按古今陵谷變遷所在多有河又善徙禹迹茫茫
雖日履大陸以下求所謂禹河者而志之恐疑信

不免相參羣言淆亂固其宜耳况九河之名始於
爾雅爾雅之作或以爲周公或云仲尼所增子夏
所足叔孫通所益梁文所補今按其文如五方四
極諸說既荒邈如山海經九州之名又與禹貢周
禮不符且霍山以爲南岳又漢武帝事則先秦以
下雜湊之文不少矣豈九河之名遂可信爲禹之
舊乎又九河之名螯岬險僻與緯書曜魄寶靈威
仰等名相似是皆三代後矜炫奇衰之作與禹貢
體制迥不相類秦漢人好立名色其習如此若以
爲禹之所名斷不敢信也郭璞李巡就其名曲爲

之解穿鑿牽紐不可爲訓孟子云不如無書信哉
竊按孟子謂禹行所無事則當時治水之要不過
因諸水現在注過之方爲之疏而道之若必鑿孔
穿渠如漢書鑿龍門辟伊闕柝底柱破碣石諸說
此數者所謂人功所造墮斷天地之性也何足爲
行所無事嘗論六合之內本有天造地設境界如
水源多發於西北東南注海有何人工可言又如
江出岷山歷巴蜀之險與河之積石龍門大約相
似而峽江以上未聞有鑿石開道者胡獨於河而
或以爲鑿或以爲破至於九河胡獨不然禹貢之

言九河也第謂之道孟子之言九河也第謂之疏
則不過因勢疏濬非強鑿九河以激之行且按水
經地道如桑乾漳衛白潞巨馬沙冶諸水俱世所
謂巨浸視灘沮濰淄有過之無弗及而禹貢一書
第載衡漳之名他水曾未之及豈桑乾諸水禹時
尙微無待於治耶抑治之而經有闕文耶竊謂禹
斷無平地鑿九河之理桑乾諸水斷無不治自安
之理所謂九河者當卽從桑乾諸水中就其近河
者而分河水以寄之則言九河而諸水胥舉矣衡
漳入河在九河未播之先故特言之今衡漳二水

猶並行禹河故道則九河可知矣水經注不言滹沱者蓋因漢書徒駭卽滹沱故僅於河水篇序河之原委而已足也知徒駭之卽爲滹沱則太史以下又可知矣不但此也周禮大司徒川有衡澤有虞溝逆地防各詳其法九河大川必無闕塞及定王河徙至漢不過二百餘年豈有九河故道遂至湮沒卽不可復攷惜漢人舍桑乾諸水以別求其所謂九河故求之終不得其處後世愈求愈疑致眾說紛錯如此耳幸地理傳徒駭卽滹沱一語後之好古者猶得意會言之特存其說以待好古者

決擇焉

碣石慶雲縣志碣石又名馬峪山古屬無棣今折海豐爲九河入海處

按志說畿輔通志常辨之謂大河一由東光縣歷南皮滄州青縣靜海而達於天津此西漢時大河入海之道亦卽北宋時合永濟渠入海之道一由甯津縣經南皮東歷鹽山慶雲而達海豐是爲北宋時東流之道近有指東流爲禹河故道以海豐馬峪山爲碣石語多不經甚至謂善長南產不知北地高下按善長居范陽魏書有明文豈未之見

耶此蓋爲縣志言之耳要之稽古者恃經與史觀水者有源與流禹貢大陸碣石在冀州九河在大陸之北河自龍門積石至大陸播爲九河同爲逆河入於海此源流之見於經者也漢書河水至章武入海宋志河合永濟渠注乾甯軍爲北流自魏恩至德滄入海爲東流此源流之見於史者也乾甯軍爲今青縣地滄州所隸雖廣而史以德州並言則其所謂滄州者蓋指鹽山慶雲言之蓋海豐在大陸之東故謂之東乾甯軍在大陸之北故謂之北若禹河至海豐入海則當曰東不當曰北播

爲九河又使碣石在兗則禹貢夾右碣石之文當在兗州不當在冀州且縣志第見漢書鬲津在鬲爲今山東境不知漢志明言徒駭卽滹沱由平舒入海豈亦得以海豐概之况據禹貢碣石之上有逆河逆河之上乃有九河今縣志不問逆河所在第謂九河在齊地則碣石亦當在齊不亦妄耶又况所引秦皇刻碣石門則彼碣石以秦皇刻碣得名與禹貢何與善長南產之說之謬又不必言矣按碣石之說不一天津縣志辨之甚詳其說曰漢書注臣瓚云禹河入海乃在碣石漢魏隋唐地志

言碣石者多以爲案驪城據禹貢導岍及岐至於荆山逾於河壺口雷首至於太岳砥柱析城至於王屋太行恆山至於碣石入於海此所謂碣石也然曰逾於河則不可以爲導河故孔安國傳第以百川言之至於導河則不言碣石惟冀州曰夾右碣石入於河則碣石明在禹河海口之右故臣瓚有河由碣石入海之說宋黃文叔因謂導河不言碣石爲省文也然諸家之說本論碣石有不足爲禹貢之碣石證者據漢地理志右北平郡驪城縣有大碣石山遼西郡奚縣有碣石水元和郡國志

謂在遼西郡臨渝縣又或謂在驪城隋地理志及

通典文獻通考俱謂在盧龍唐地理志又謂在石

城明一統志謂在昌黎孔穎達疏亦謂在驪城水

經注同其說曰今枕海有石如堦

宋本作甬

道數十里

當山頂有大石如柱往往而見立於巨海中世謂

之天橋柱又方輿紀要載郭造卿謂昌黎縣有仙

人臺世謂之天橋柱地理今釋又謂今昌黎撫甯

杳無踪跡今有人自永平來者又多見天橋柱在

海中人謂之碣石其說錯出如此至通釋謂有三

碣石杜佑金仁山謂有左右兩碣石則又紛出不

一矣其傳會爲禹貢之碣石者大抵不離漢書說據文穎云漢省桑縣入臨渝唐地理志謂石城本臨渝又謂盧龍軍有昌黎戍畿輔通志謂漢驪城唐爲石城又謂晉省臨渝爲肥如唐志又謂盧龍本肥如畿輔通志謂桑縣爲今昌黎驪城爲今樂亭則諸說俱本漢桑縣驪城言之但據畿輔通志樂亭昌黎東西相距只三十里烏得便有兩碣石據明一統志碣石山在昌黎西南五十里據畿輔通志昌黎西南六十里至樂亭縣界則碣石去樂亭只十里水經注又云碣石如甬道數十里則焉

知不綿亘於兩縣境中就昌黎言則以爲在昌黎就樂亭言則以爲在樂亭其實只一碣石耳又秦本紀始皇遊碣石刻碣石門武帝紀元封元年登碣石望海水經注漢武帝登碣石望海刻石地理志莽曰碣石據漢書圓碣方碑蓋以石刻言則焉知莽不因秦漢石刻而名之况名始於莽烏足混爲禹貢之碣石且據漢志兩碣石下無河水入海之文其言河水也第云至章武入海不及兩碣石又謂桑縣官水南入海碣石水南入官使河由此碣石入海則碣石之水何以不入河而入官若據

山海經碣石澗水東流入河則碣石又在大河海口之西與諸家說尤不相符則禹河不由此碣石入海明白甚矣或謂此當以水經注海中之說爲是卽如漢地理志桑縣驪城明明有兩碣石元和郡國志以爲在臨渝或又以爲在驪城註兩存其說而不能決明一統志明謂碣石在昌黎今釋又謂昌黎杳無踪跡蓋惟山在海中故指之莫定其方求之莫得其處耳其說似矣然水經注之說亦有可疑者如云今枕海有石似酈時此石現在海岸人共見之且常見之矣繼又曰往往而見則仍

與三神縹緲等耳末且曰漢世苞淪洪波則所謂枕海有石又何所指况所載三齊略記秦皇見海神管子齊桓公見俞兒事其說近怪蓋善長習氣如此不可據爲典要也或又謂河水旣由章武入海則碣石當在章武漢書言章武不言碣石者此王橫所謂爲海所漸蓋漢世已無遺迹故不言也且碣石之在章武古亦有可據者據戰國策蘇秦云燕東有朝鮮遼東南有碣石雁門之饒桑在燕東與朝鮮遼東等不得謂之南據漢書言河間在燕南是章武誠燕南也况魚鹽之饒古稱長蘆桑

雖瀕海不及萬分之一自不應舍此以言饒鄭元
謂此別一碣石在九門縣孔穎達謂驗九門並無
此山則焉知不卽在章武海中况據史漢武帝登
碣石望海地形志謂章武城有漢武帝臺水經注
以爲漢武望海處今滄州臺基尙存則碣石又當
在滄州海中其說亦是但茫茫海若無迹可求傳
會言之與桑驪諸說何異若以理論禹貢明言碣
石苟海岸實有此山則百家爭鳴當有實指所見
以正之者何至于百年聚訟而莫之決且據戰國
燕南有碣石漢志燕南不言碣石則淪海之說事

或有之王橫昌言於朝班固筆之於史當非無據
而云然要之自禹貢言則碣石不過在逆河海口
之右其以禹河至碣石入海特臣瓚說原非確有
所據也今姑無論碣石之所在但禹河旣由章武
入海則碣石去章武當自不遠也

橫海軍河間府志唐以滄景德棣爲橫海軍開元
十三年滄州治西南置橫海軍使貞元三年復置
橫海軍節度使領滄景二州治滄州永貞十三年
以德滄棣州隸橫海節度使長慶二年橫海節度
使復領景州太和二年橫海節度使增領齊州三

年罷橫海節度使尋復置更號齊滄德節度使

保順軍金史地理志周置軍於滄州無棣縣南二十里開寶三年又以滄棣二州界保順吳橋二鎮之地益焉又云治平中徙無棣縣泊保順軍卽縣治置軍使

鬲縣城河閒府志舊墟在鬲津河壩慶雲縣志鬲津廢址漢析無棣置鬲津縣在鬲津河壩

廢山縣河閒府志索隱云在渤海

臨樂廢縣河閒府志入滄州

滄溟廢縣河閒府志元爲滄溟縣

范橋縣河閒府志宋爲范橋鎮本名范橋渡今俱廢大觀時陞爲興濟縣

廢清州河閒府志元太宗二年改清州爲清甯府甯州河閒府志五代時陷契丹置甯州周克復之置永安縣

東鹽州河閒府志唐武德中置按上條皆見舊志據隋分陽信置無棣漢陽信屬渤海鬲縣隸河閒無分置之說詳地輿志舊唐書武德四年竇建德分

饒安置鬲津亦非無棣又鬲縣在山東故城廢址安得在此又據畿輔通志臨樂卽臨津旣載臨津

重刊天津府志 卷三十三 古蹟
不必復載臨樂渤海山縣不知所指又元史地理志滄州領清池樂陵南皮無棣鹽山五縣無滄溟之名則安有滄溟廢縣又宋史地理志以范橋鎮爲興濟縣而不名范橋縣又明改清州爲青縣未聞青縣治外又有廢清州又契丹改乾甯軍爲甯州周平三關置永安縣宋復置乾甯軍則乾甯軍與甯州永安及今青縣一耳未聞又有廢甯州又唐書地理志武德四年置州尋廢仍爲鹽山則州卽縣治非於縣外別建州也姑依舊志存之以上俱照錄前志

冢墓

天津縣

明少保殷尙質墓在城西善慶菴北天津人任遼東總兵陣亡賜葬於此縣志

國朝總兵俞懋墓在葛沽東南三里許懋字天行浙江紹興人順治壬辰進士歷任福建總兵以平臺灣鄭芝龍功授左都督

左都督李柏墓在稍直口南里許

提督李國柱墓在炒米店南半里

武定府徐觀孫墓在姜家井南二里

提督俞金鰲墓在葛沽東南三里許

張起之妻貞婦趙氏墓在東沽俱同上

貞烈墓在西門外半里葬譚應辰妻陳氏趙某妾

裘氏阮奇玉妻諸氏金振妻丁氏名四烈墓前志

於乾隆十九年葬貞婦殷氏乾隆五十九年葬貞

女袁進舉之聘室梁氏嘉慶十四年葬張延年之

妻李氏董有智之妻章氏道光七年葬烈婦李氏

道光十七年葬吳彬之聘室貞女史氏道光十九

年葬桂松年之聘室貞女尹氏今呼為十一座墳

縣志

青縣

漢參戶侯墓在縣南寰宇記在長蘆縣三十六里

大清一統志 俞宗濂按河間獻王子免封參戶侯前志在州西北二十里茲依一統志入此

宋萊平章墓在縣南二十里萊村之北前志

杜將軍墓在縣南七十里今鎮名杜林墓

李參軍墓在縣南衛河西李家淺鋪之南

金寇公墓在縣西五里

元尹公墓在縣西五里子任監察御史至正間立

碣詳金石俱同上

靜海縣

元河間路總管李進墓在城北固甯鄉詳金石前志

諸路新軍總管李世和墓在城北里仁鄉詳金石

明欽天監監正張紳墓在城北里仁鄉翰林學士

劉璣撰誌俱同上

國朝前刑部左侍郎勵宗萬墓在縣境陳兆崙撰墓

誌銘新通志

滄州

趙武靈王墓在舊州城東南太平寰宇記州城東

南隅先有古墓高二丈唐貞元十三年增築外城

掘得銘云是六國時趙武靈王墓遂置祠云按趙

世家主父餓死沙邱宮應劭曰武靈王葬代郡靈

邱縣據此則墓不應在滄州今依舊志存之前志

唐漢南節度從事胡曾墓在忠孝鄉高丈餘周圍

十餘丈州志按前志州志此下尙載有高仁墓

德之碑而不詳其年代事實茲故從闕

橫海軍節度使程日華墓從子懷信附在將相鄉

俗呼程家林俱德宗時滄州節度使前志按舊志唐

程知節墓在州之將相鄉有土阜二南北相去不

滿百步南一阜高一丈周迴二十丈故老相傳知

節從征遼東道卒遂葬於此土人號其地曰程家

林鄉曰將相鄉北一阜頗低以為山人既卜葬知節亦卒因耐葬其說甚謬予考之唐書知節卒陪葬昭陵在長安距滄州蓋風馬牛不相及其謬一也太宗征遼時知節為瀘州都督實不俱行其謬二也知節卒於高宗顯慶二年上距征遼時將十三年今謂征遼道卒其謬三也此二墓者蓋唐橫海節度使程日華及其從子懷信之墓而土人傳訛以為知節耳何以知之德宗時立橫海軍節度置司滄州日華以興元元年為節度使兼御史大夫既卒子懷直繼之官至尚書右僕射嘗入朝從

兄懷信因代為節度既卒子執恭繼之官至司空封邠國公元和十三年改邠甯節度使程氏凡四世據有滄景之地而懷直入朝執恭移鎮則此兩阜為日華懷信無疑且程氏世鎮滄州將四十年史稱日華家人子弟列宿衛者三十餘人則在鎮留居者必眾故地曰程家林又日華父子兄弟皆建節鉞位兩府封上公故鄉曰將相鄉土人但見有墓輝赫若是莫知其誰直以所聞謬為之說如此

程篁墩集

橫海軍經略副使孫公墓在蘭家新莊西南

詳金石

州志

名州司兵姚府君夫人李氏墓在舊州城東南七

里詳金

滄州節度押衙檢校太子詹事宋自昌墓在後王

宮屯莊北詳金

長樂馮廣清墓在舊州城西南詳金

義昌軍故衙前將劉士宏墓在舊州城東南詳金

幽州節度要籍祖君夫人楊氏墓在古元都鄉流

祥里詳金

魏國太夫人劉氏墓在州東六十里墳莊北義昌

軍節度使盧彥威妻詳金

滄州魯城縣令劉談墓在後王官屯村南詳金

宋工部侍郎張子思墓在舊州東墓久湮嘉慶二

十年有耕者得其斷碣子思官工部侍郎文節公

名知白嗣子

元管軍千戶魏尙忠墓在城東南一百里北良村

墓已無有殘碑詳金按城東南九十五里劉家莊

東南有五臺相傳為康王墓亦名北陵俗名燕臺

臺東南三里即北良莊昔名北陵蓋因此臺而名

也然臺圖雖有可攷而不詳其年代事實故從闕

明王子忠墓在聖佛莊有碑天順七年立

太子少保戶部尚書諡恭襄馬昂墓在城南七里

諭葬

南京戶部尚書張縉墓在河南蓮花池諭葬

刑科都給事中趙杲墓在城東

南京通政司右通政強珍墓在河西

都察院右都御史王紳墓在城南十里回回灣

太子少保南京參贊機務兵部尚書戴才墓在城

東八里屯諭葬

泰安州知州朱用錦墓在城東迎春寺俱同上

廬墓孝子張公墓南陳屯有碑萬曆六年立采訪冊

掌廣東道監察御史王翔墓在城東南榮官屯係

鹽山人萬曆十一年立俗呼王天官墓今碑沒入

土中惟墳前一石獅尚存同上

龐燦然墓在舊州城北有誌功碑今仆州志

國朝誥贈內翰林宏文院侍講呂詠墓在城東六里

鞠官屯

戶部左侍郎王公弼墓在河西

戶部尚書戴明說墓在八里莊

翰林院編修劉果實墓在集北頭

山東巡撫張逢堯墓在城東三里莊

廣東按察使司按察使李廷揚墓在州南六撥村

江蘇蘇松太道李廷敬墓在州南六撥村

甘肅按察使司按察使吳沂墓在城西北河西陳

屯

內閣侍讀學士葉汝芝墓在城南三撥村俱同上

李經國墓在華嚴淺孫奇逢撰墓誌新通志

南皮縣

周尹吉甫墓在縣西三十里高三丈前志古老傳云

墓有樹二株自有墓以來即有此樹柯條鬱茂不

覺其老俗呼年長樹大清一統志按墓在縣西十里牛

家堂西縣志

大興翁方綱奉

帝念周賢弼東都六月詩何年因北伐表墓在南皮志乘

聖題詞自昔推為憲於今日秉彝蕃宣功懋矣孝友誼同

皇心重念茲邑沿秦代置地指縣西陂父老徵前紀傳聞

到伯奇文章於雅列人表以宣隨臣得從春蹕欽

承薦醕卮清風聆萬古

天語穆來吹漢雋不疑墓在縣東南二里前志高五丈魏太祖因

不疑冢為固以攻袁氏因亦名曹公固大清一統志知

縣李正華立石表墓縣志

鮑宣祖墓在高樂故縣城東同上

晉石苞墓在縣城西十二里城冢記南皮有石苞

墓前志

北魏刁協世墓在刁公樓同上刁遵墓誌載寔於饒

安之西南孝義里今無攷其時渤海饒安即今之

舊縣鎮熙平二年改屬浮陽郡遵卒於熙平元年

故猶稱渤海詳金石縣志

唐賈耽墓在縣東有權德輿銘大清一統志

夏侯義墓在城東北里許詳金石縣志

宋賈黃中墓在縣城東前志

明徐廷錫墓在臨津店南大學士李時銘

張璿墓在城西北十六里窰廠新莊東南

張淮墓在城西南都御史張璿銘俱同上裔孫玉冊

瑛附側縣志

湯賓墓在城東十里修撰蕭良友銘前志

張謐墓在縣西南三里石通政李觀光銘

鄭金墓在城東南吏部侍郎諸大綬銘

高瑞麟墓在西關外

劉顯道墓在城西十五里行太僕寺卿莊泣民銘

李騰鵬墓在縣東南里許尚寶司卿王嘉言銘

侯楹墓在縣北寶家嶺諡忠端刑部侍郎孟兆祥

銘

國朝湯鉉墓在祖賓墓側山東巡撫翰林祕書院學

士劉芳銘

柴克振墓在城北三十里馮家口俱同貴州道御

史宮夢仁銘縣志

黃家棟墓在城西三里原任戶科給事中莊憲祖

銘前志

張永譽墓在城西南三里曾祖諡墓側原任戶科

給事中莊憲祖銘同曾孫莊祔墓側縣志

柴堪棟墓在父克振墓側知縣劉址銘前志

吳推己墓在城南五十里虹縣知縣劉慶藻銘同

男維哲祔側縣志

湯裔振墓在高祖賓墓側武城縣知縣石潤廣銘

前志

侯堪墓在城北五里許張家口翰林國史院檢討

卽墨藍潤銘

侯幼鉉墓在堪墓側吏科左給事中滄州劉大謨

銘俱同上

張遼冢墓在縣東南五十里封臺孫鏐耐墓北縣志

張卿子墓在縣北六里金沙嶺子金城耐側

張慶長墓在縣北三里李家莊子端城孫志詠會

孫春育均耐側

劉有銘墓在城東南五十里黑龍村上俱同上

鹽山縣

漢公孫宏墓在今治城中西北隅地名封墩又名

無影臺縣志邑人劉曾墩登無影臺詩西北有

互我來升其顛荆榛時窘步古樹連荒城望望但
烟霧自昔稱無影此名豈虛附胡為遞層陰晚景
遍薄暮可知幻與真變遷無定
數世事類皆然達觀應自悟

漢姚期母墓在村店東南故老傳聞年遠無稽

唐許元遇薦福墓在城北二里許有墓碣咸豐初

年耕者得之後移於文廟詳金石俱同上

明王翱墓在縣西舊通志在縣西帽架園南十五里大清一統志

成化二年諭葬彭時撰神道碑前志

楊文卿墓在城南七里許言詩撰墓表大清一統志

均牛留村訪楊鷗海墓詩鷗海幽靈何處棲牛留
遙望使人迷離離古岸風干樹寂寂荒原雨一犁
高價由來播渤碣奇文當日指星奎
百年宿草蒼茫裏秋水東流白日西

李法墓在城西楊文卿撰墓碣縣志

曹梅墓在城東北六十里王好問撰墓表

程道南墓在城西二里邑人趙洪錄撰墓誌俱同上

七女冢在舊城南傳有生七女者死後女為抱土

築墳因名前志

宋家塋在縣趙順里塋中多琢刻者世傳古有貴

戚葬此

劉稱墓在舊城西北稱字君衡漢裔

許孝子墓在城北許孝子莊去縣二十里年世莫

攷俱同上

國朝邵汝德墓在城北二里自著墓誌縣志

劉澤霖墓在城西北里許知縣黃貞麟撰墓誌

趙景皋墓在城南四十里韓炎撰墓誌

霍恪墓在城西三里劉泳撰墓誌

孫嵩墓在城東二十五里劉果實撰墓誌

孫嶽墓在城東北二十五里劉果實撰墓誌

劉适墓在城東里許知縣梁兆榜撰墓誌

趙鑑墓在城東六十里霑化吳湘撰墓誌

孫述庭墓在城東二十里陳官俊撰墓誌

劉曾璇墓在城西二里許徐宗幹撰墓誌俱同上

慶雲縣

周吳季札子墓在縣西南七里延陵臺旁大清一統志

按小戴記檀弓云延陵季子適齊於其返也其長

子死葬於贏博之間註疏以為齊二邑又以贏在

泰山南近齊臨淄返吳當葬於齊南不應北葬於

慶雲據漢書地理志泰山郡有贏博二縣則其墓

當在其間縣志或因贏州博野而傳會之耳縣志

旭題延陵臺詩何人埋骨此荒臺爭說三號季子

回論地幾同千里遠傳疑已過百年來詩歌憑弔

終多誤賢詰遺蹤未忍猜大有

豪華留古冢斷碑殘表不堪哀

漢魏王豹墓在縣城東四十里前志

李左車墓在縣東北五十里

後唐中書侍郎同平章事李愚墓在縣南一里

元棗陽副萬戶府齊秉節墓在延陵臺側明初有

碑

誥封四川左布政使甄公墓在縣南四十里實在

沛縣寄籍祖墓在慶

山西左布政使胡欽墓在縣東偏南二十里

四川按察司副使張問之墓在縣南一里張龐撰

墓誌

承德郎東平州判官陳光大墓在縣西一里

玉田教諭楊粹夫墓在縣南一里

山西太原興縣知縣陳在庭墓在縣西半里

棗強教諭王魏墓在縣南二里

襄陽縣丞胡璜墓在縣西三里

孝感縣知縣王者佐墓在縣東十五里俱同上

國朝鞏昌府同知崔養重墓在縣南一里縣志

金華副將陳喜墓在縣東二里

黃州府同知王定鼎墓在縣東三里前志作江西通判

潁州知州劉夢楫墓在縣西二里

南陽總兵陳廷桂墓在縣北一里

潮州總兵劉允桂墓在縣東一里


甘州守備劉揮墓在縣西二里

工部員外郎劉廣恕墓在縣西二里

贈雲南糧道蒲縣知縣崔旭墓在縣南一里

戶部郎中李楨幹墓在縣南四十里俱同上





重刊天津府志

卷二十二

冢墓

三

卷二十二終

